

國

朝

文

匯

國朝文匯乙集目錄

卷三十二

陶元藻

字逸亭號望村浙江山陰人諸生有泊船山房集

張雨村湖上遊草序

莫石池遺集序

清源山記

泊鷗莊記

張金友傳

黃山人傳

李文藻

字素伯一字莖曉號南湖山東益都人乾隆辛巳進士官廣西同知

重修魯仲連先生祠墓記代

吏部左侍郎俞公傳

余廷燦

字少卿號存吾湖南長沙人乾隆辛巳進士官編修有存吾文編

原文

慎微

民貴

九

節烈辨

九

明指揮使謝公承任事傳後序

十

崔

述字東璧直隸大名府人乾隆壬午舉人官浙江知縣有無聞集

氣勢

十二

訟論

十二

贈陳履和序

十四

倪

賜字開谷江蘇常熟人布衣著有香祖居集

仲簡譚君傳

十六

張烈婦傳

十六

王貞女傳

十七

錢大昭

字晦之江蘇嘉定人太學生有卓聞齋稿未見

三國志辨疑自序

十八

袁穀芳

字實堂安徽宣城人乾隆壬午舉人官江甯教諭有文集

春秋書法論一

二十

春秋書法論二

二十

春秋書法論三

二十一

春秋書法論四

二十一

送黃先生推任泉州司馬序

二十二

送施鐵如序

二十三

國朝文匯乙集卷三十二

張雨村湖上遊草序

陶元藻

憶往時余與厲樊榭徵君魯秋塍庶常暨王穀原金壽門施竹田曾賦詩棲霞嶺畔而方外之大恒巨漚亦嘗相過從酬和勿輟蓋已閱三十餘載矣其間余以奔走衣食之吳之燕之粵之閩不至錢塘門外者二十一年昨歲葺廬數椽於西湖北山下林岫依然煙波如故惜屬魯諸君子凋喪無一存者已不勝黃公酒壚之感芒鞋竹杖踽踽獨行樵唱漁歌誰為互答而雨村張君適從石梁觀瀑歸夫石梁為天台靈秀處天台必捫萬籬披荆棘幽剔冥據方覽其勝若西湖則異是一出郭而巖壑流峙魚鳥浮沈叢樹環花之掩映千態萬狀畢呈心目間伸紙吮毫無非妙諦使賦詩者猶將搔首攢眉李鍛月鍊始能成章則興會無天機亦淺雨邨以縱達不羈之才得川泳雲飛之致淋漓傾寫莫可終窮而僑寓於台三三六橋轉同鄰舍忽忽仍挂帆東去今春復返於杭出湖上遊草屬余為敘果強半皆去年湖中句也余惟昔人論詩司空表聖主神韻嚴滄浪主趣味高廷禮主風格作詩者豈能兼有其長然亦不必兼擅其長苟具一端已足掉臂詞壇以自鳴於天下余結習未消雖間作候蟲之語顧老且病欲如三十年前摩旗登壘闢險尖叉百石難彎徒慚魯縞而以心如

廢井。復得雅誦新詩。是又獲益於湖山縹緲之外者已。

莫石池遺集序

人生富貴利達。莫非過眼雲煙。即錮骨南山。亦終為塵土。惟發為詠歌。有合於風人之旨者。可垂千百世。以流播於無窮。今年冬。余訪友人莫琢齋於城南水榭。琢齋出一編示余曰。此吾石池伯兄所遺詩卷也。錢有日矣。請君賜一言。弁諸簡首。余聞石池賦資聰穎。善讀書。尤耽聲韻之學。不幸天亡。年纔二十有八。嘗與周徵君西序合刻曉劍堂集。問世夫西序以能詩名。其倡酬之侶。吐屬當不同於凡近。因取琢齋所授者。迴環三復。求其雋句。而雅誦之念。初盛風格。如海外三山。可望不可即。欲窺中晚唐。南北宋門庭。近日詞壇。亦寥寥無幾。蓋揣摩試帖者。義冠博帶。浮豔是趨。滿紙陳言。性靈汨盡。其沈淪窮巷之士。又拔劍斫地。聲激烈而不平。風雅一途。漸漓漸遠。石池毫端清湛。能擺脫世俗醜態。雖布衣終牖下。不無愁苦之思。然寄託情深。慨嘆中。仍含蘊藉。可不謂蕭色中之佼佼錚錚者歟。嗟夫。人以亡而增感物。以少而見珍。使操觚者尚在。即平時所著。豈逸多篇。亦何足動人深惜。顧留此區區於木拱墓門之後。則隻字飄零。皆昌谷囊中嘔餘血液。較諸曉劍。為尤可悲也。當西序徵車北指時。咸謂扶搖易上。詎料一蹶不復振。逮暮年牢落無聊。與不永其年者何異。且西序

之卒也。後石池數十寒暑遺區中豈無殘鱗片羽。未聞有謀剗而繼前編者。今石池以六十餘載長寐陳人猶有白頭昆弟抱痛鵠鵠纏綿悵惻命其子若孫續事雕鐫俾完手澤於戲石池其不朽矣。

### 清源山記

明以前清源山足供游覽者凡一十有八處。自經兵燹之餘榛莽叢生無人剪拂而亭臺龕殿悉為狐兔所宮。今所存者僅清源洞及彌陀賜恩兩巖。賜恩去城較近。城中文武諸吏讌飲必集於此。棟宇多於林木塗飾丹黃殊減幽秀致。余初至泉南一陟不復登其西峯遠而特峻松杉枯栢之屬千有餘本。修篁萬餘箇。惠安南安二邑俱望見之。是為清源洞。戊子九月余乘肩輿上行七八里初聞鐘磬聲復行二三里聞聲轉聞因舍輿而步。曲折穿林始見佛屋。會天方大雨疾趨石磴三百餘級氣喘欲絕就軒廊臥少頃乃甦。雨亦稍稍止。周覽梵宇。謁裴仙石室。登竹樓啜茗數甌徘徊者久之。彌陀巖在半嶺亭之下。天雖霽石壁礪縱橫與已無所用。命兩僕夫掖之行。至瀑布懸流處跨石而過。復有亭翼然。游人觀瀑者必憩於此。由亭西上為小庵庵後二巨石如熊羆對立夾紫紆仄逕逕窮而石屋見。嵌空玲瓏有丈六金身半尼在焉。禮拜既畢復歸於亭。飛流濺衣清沁毛骨其聲與松濤相間。泠泠然謐謐然余

持螯把酒。浩然放歌。時游者皆注目相視。疑為狂生。而余亦不復作人世間想矣。夫山中之勝。以泉石與樹三者兼備為美。賜恩有怪石。惜林疏泉細。清源林最盛。泉亦深遠。石不能奇。若夫突兀潺湲。蔚乎幽秀者。莫過於彌陀。雖然。煙霞品第。真賞為難。不到彌陀者。固不識彌陀。恐常過彌陀者。仍不識彌陀。此吾所以對彌陀而有憾也。

泊鷗莊記

乾隆四十年冬。余得汪氏舊莊於錢塘葛仙嶺下。枕崇阜。面清流。去郭已遠。入山不深。泉石之交。禽魚所聚。斷橋在左。林處士孤山在右。中貫以白沙隄。而平湖煙露。時繚繞於軒楹戶牖之間。康熙間。為顧且庵侍御。燕游處。其西偏有水一泓。相傳為葛稚川煉丹井。元張伯雨詩所謂一宿葛翁丹井上者是也。顧氏遂以此顏其廬。屬新城王阮亭為之記。侍御以淹雅見稱於世。故一時吳中名下士。咸相過從。裙屐管絃。殆無虛日。可謂盛矣。其後子孫中落。此地歸於汪氏者。又三十年。西湖風俗。凡別墅門戶漸衰。即賃人作殯舍。汪氏有莊。纔十餘年。家已不振。舊日朋游之所。盡為鬼嘯之場。燕泥墮梁。榛莽彌圃。有求仙井遺踪者。過夕陽山下。荒徑頽垣。莫不躊躇而悽愴。余既得之。明年。雞草翦萊。斬其惡木。益以嘉卉。上棟下宇。傾者扶。腐者易。赤白漫漶不鮮者。塗而飾焉。中三楹為雙桂書堂。以庭有老桂兩本。接葉交柯。網罟馥郁。是



亦淮南招隱之遺也。北為竹香梧影山房。以前有三梧高峙。後有修竹百餘箇。翠碧交相映也。右為西齋。以杲日東升。負暄獨早也。折而南為拜石軒。以檻外一拳卓立。怪且秀也。軒前稍西。即丹井。闢而成池。池上有橋。橋畔增建鳬亭。以淨綠中魚鳬出沒。憑欄可觀也。嗟夫。一邱一壑。為地幾何。百年來三易其主矣。然則古之始甯梓澤。輞口午橋。其高傾曲平。大率類是。宇宙間何一非煙雲過眼者。而李贊皇乃恐後人損其平泉草木。繡綿暮歲。垂誠諄諄。抑何所見之隘歟。今年春。莊內工始竣。吳越士大夫。同倡酬者甚眾。有謬相推許。謂余主盟壇社。抗美當年。高咏曠懷。卓越前輩。余則何敢。惟願氏叛造之始。僅矮屋數椽。為文酒流連之地。汪氏仍其簡陋。今乃析椽費。稍變其初。俾百年父老。過而見之。以為踵事增華。後來居上。或庶幾焉。抑嘗思之。人生於世。猶鷗鳥之在水。時而泛乎中流。時而泊於汀渚。然則人即鷗也。鷗即人也。曠懷游目。久暫胥忘。興廢乘除。付諸造物。謂吾泊於斯也可。謂鷗泊於斯也可。此乃泊鷗名莊意也。視彼平泉主人。有別參一解者。而湖山之美。已貺我良多矣。因為之記。

### 張金友傳

金友。字聲子。同安西塘人。九歲能詩。父斯璠。名諸生也。日課以經史數千字。皆成誦。

年十六而孤。遭兵燹。託鎮軍幕府。以自庇。會草檄。以其年少。不之秘也。友從旁言其不可。鎮軍大驚。即囑署稿。果稱意。由是器重之。其母聞之曰。童子饒舌。禍胎從此始矣。乃自黜廢。後海氛再熾。逆帥聞其名。欲致之。因竄匿安溪山谷中數年。迨閩疆底定。登康熙庚申補科賢書。初選得湖廣司理會。國家裁汰是官。改補仙游教諭。時有縣胥凌諸生。訟之宰。宰右其胥。欲以開堂罪視諸生。友力持不可。既而將交額於上官。因從容謂宰曰。如此必皆有謫。第某黜為愛士。公黜為庇役。輕重之際。願明公熟思之。宰為改容。乃直諸生。又有巡司攝縣篆。欲於縣堂責士。召胥斗。亟友爭曰。學政全書。此地無責士體。恐後以為例。公何忍焉。亦得罷。巡撫李公以友賢。疏薦之。友請歸養。李公不憚。因備言母老。薦經播竄。甫獲息喘。不忍遽離狀。李為之泣下。乃歸。仙游人勒石以誌不忘。居鄉排難解紛。族姓無煩有司判牘者。人咸重之。稱為旋園先生。旋園者。友之書齋也。年七十五卒。子迪太學生。工琴弄書法。更精於繪事。至今得其片紙。猶值數金。終身不履公庭。以高行見稱。

### 黃山人傳

山人諱克晦。字孔昭。號吾野。惠安人。生於萬厝間。家貧好學。工畫人物山水。筆力蒼健。其著色布景。金摹沈石田。襍諸石田畫中。幾不辨其真贋也。幼嗜吟咏。然無詩名。

詩亦不甚工。或告之曰。君工畫。不能使畫重。工詩。能使畫重。遂發憤爲詩。聞永春有李氏多藏書。乃借而縱觀之。凡十年。復出游匡廬。登嵩岳。攬泰山。梁父之勝。流連河濟。徘徊二京。詩遂演漾宏肆無涯。既而剝落鉛華。淡遠清微。宛有錢劉之致。主持風雅。雄長詞壇。而畫益見稱於天下。性高潔。不樂仕進。亦不愛舉子業。栖隱陋巷。或裹糧至山中。數月始歸。自稱吾野山人。人以山人呼之。大喜。是時四明沈嘉則。魏郡謝茂秦。皆以布衣擅詩名。而閩中則克晦爲尤著。清源山在泉州東門外。蔚然深秀。凡郡之人文。皆鍾毓於此。前明尤多。林木梵宇。四方騷人逸士。過泉者必至其地。嘗有粵人某由閩赴京。謁一朝貴。朝貴使閩人詢曰。既從閩來。可游清源否。對曰。未也。又詢曰。可識黃吾野否。對曰。未也。遂夷然大笑曰。山不到清源。人不識吾野。則其人可知矣。竟勿見其爲一時推重。蓋如此。克晦有匡廬集。楚游集。北平稿。黃克纘棠刻於聊城。今其裔孫隆恩重刻之行於世。同里黃彥標亦工畫山水。沈鬱蒼古之氣。非凡手所能及。得其片紙尺縑。珍若拱璧。然觀克晦之畫。則又超然遠矣。

重修魯仲連先生祠墓記代

李文藻

魯仲連先生遺蹟見於山東志乘者。聊城有其臺。新城有其陂。高苑有其墓。縣則祠與墓皆在焉。臺之在聊城見於水經注。而其他則世人相傳云然也。夫聊攝以東皆齊也。縣在秦為聊城地。漢始分置今縣。至唐併於聊城。而金復分置。迄於今兩縣相距才六十里。而兩縣之故城又倍近焉。蓋先生射書遺燕將時。嘗居於此。而後人因為立祠耳。祠在縣城東北三十里仲連邨。明嘉靖間學道陸公鉞葺山東通志。謂魯連邨後改王樓店。舊有祠。而神州古史考則謂之望魯店。以音譌也。余宰是縣之又明年。潘濮州汝誠過祠下。賦詩見投。余因謁而葺之。又於祠北二里築其墓。縣志謂墓久平。康熙二年知縣王君畫一乃築而植以松。且勒石焉。嗚呼。先生之傳於世。其不待祠與墓也明矣。然司馬子長傳老子必著其鄉里字諡。及其子孫之封爵。諸先生傳東方朔特書其病死。蓋世多以老子東方朔為神仙。而掩其修道德愛經術之實。作二傳者其有深慮乎。先生對辛垣衍曰。秦肆然為帝。連有赴東海而死耳。史記遂謂田單屠聊城後魯連逃隱於海上。而國策實無此文。夫先生者何人也。鮑氏謂孔子之所謂逸民。非周衰辯者之圃也。漢藝文志魯仲連子十四篇。列於儒家。其書不幸而不傳。又不幸生孔子後。不得論列於伯夷柳下惠之間。而世之好異者或因

國朝文匯

卷三十二

五

國學扶輪社印

逃海一語等諸荒怪奇幻。俾與安期生盧敖者伍。而豈知其瘞骨之地。固歸然而在是耶。是又考古者所宜特書者矣。乾隆三十有一年夏五月。在平縣知縣宛平李濟記。

吏部左侍郎俞公傳

俞公諱兆岳。字岱視。浙江海鹽人。父宣琅。官大竹知縣。公生十一歲而孤。母吳知書。有志節。陳說古事。教督公。公循蹈義法。童而知方。康熙中。由廩生捐貢。肄業國子監。期滿。授宣平教諭。遷大田知縣。喜曰。庶幾乎少白吾母之教乎。則徒步微服抵縣。一童襍被。隨寓逆旅中。訪利病數十日。始出片紙。召胥隸一縣大驚。自是無留獄。縣以治。調臺灣縣。臺灣海外巖邑。多武弁。率恃功驕虐。民不堪。則相聚為盜。公以計捕其魁。得一冊。脅從者姓名盡載焉。武弁欲取功。要窮治之。公乃置酒召弁飲。熾炭行炙。出不意。投冊炭中。立燼。弁大詬。公好語曰。殺人邀賞。仁者不為也。大吏聞之。以公為長者。卒聽公誅其魁數人。而餘不株問也。遷開州知州。遭母憂。去官。服闋。補松江同知。蘇松賦額溢他郡。公力言於布政使西林郭公。轉請怡賢親王入告。得豁免浮糧四十餘萬石。又言海塘易濇。宜易土以石。上官是其言。俾督其役。大學士高安朱公出視海塘。奇公才。特疏薦之。且曰。兆岳如苦行頭陀。年向衰矣。及早用之。猶可得其

死力有

旨召見入對

上甚壯之。授青州知府。是時雍正五年也。其年山東旱。公以事至省。城饑。大府召優鵬公。公曰。久不雨。

天子減膳撤樂矣。為人臣子。忍對歌舞安坐終讌乎。立飲三爵。趨而出。大府怒。思中傷之。公即引疾去。疏入。召詣闕。

上望見公曰。強項吏。上官所不便。朕知其非病也。顧宰相曰。此人可何官。宰相據例對。

上曰。俞兆岳。非常士也。亦拘以例乎。授通政司參議。適江南海水溢。決壞海塘數處。惟公所築塘屹如舊。督撫言諸朝特擢公太僕寺卿。總理海塘。時崇明湮沒。死者相枕藉。公出賞格。募人掩骼。招流民赴工就食。閱七載。成石塘七千一百二十八丈。自柘林城至金山城。凡四十五里。復於金山滄缺險要地。捐俸築片石小塘五百五十丈。以衛之。民得安堵。乾隆改元。

今上即位。擢都察院右副都御史。巡撫江西。

陸見陳母苦節。且曰。臣母三十餘而寡。又受封例。不得旌然。臣孤苦無狀。非母不能。

有今日乞省臣所例得

覃恩破格旌臣母

上命建坊祀卽孝祠而公仍授階如制公之撫江西也謹身察吏廉民之疾苦七十  
二州縣無不達得請免浮糧十餘萬兩革九江贛州二關額外濫稅如干款除積害  
十有七事勒之石置石府縣官之門示永禁七閱月而

召為吏部左侍郎疏請便省墓至里招故人雅飲論教事分俸贈族黨置義田百畝  
族人皆喪祭葬取給焉時海寧方大築塘閘部無錫松公總其事公為松門生聞公  
至使使候公公進使者曰

天子發內府錢築塘而派夫擾及七縣沿隄取土壞民田墓怨聲流道路吾厭聞之  
矣今日吾不言於師則負師不言於朝則負

君其何以處我使者兼程返告嚴明則馬上傳箭諸不便事悉罷到部未久江西巡  
撫岳公奏公前解關稅較常年缺額九萬餘兩下刑部鞠之實浮減免銀二萬五千  
兩除賞官兵其無款可銷者才三百八十兩事在赦前得免議奉

特旨昭雪而公已卒年七十有七公天性耿介能勞苦勇於有為未至大田時大田  
民有送妹嫁而失所在者其家訟之官官疑其妹之壻也拷掠自誣服核尸所在云

在某所。發之無有。則盡繫兩姓迎送者。公至盡釋去。而宿禱於城隍廟。誓曰。罪人不得。則吾當斷廟而去。官夜則夢神示以小旗書盛字。旦即廟召所釋人。問之曰。某以肩輿行乎。曰然。曰神已告我矣。殺人者輿夫也。時有二人。在廟竊瞰。伏泥鬼後。觀者衆。推泥鬼仆。適當二人頸。二人面如土。即輿夫也。鞠之吐實。果得尸。其折疑獄誠心。推求多類此。而築海塘則功在蘇松。其法疊層石而中穿之。貫以鐵筍。其橫犬牙相銜。鎔鐵灌之。膠結眾石為一。水即甚怒。不可動。先後督撫如李公衛尹公繼善。皆奏上其法。為築海塘式。公之既葬也。有數十人詣祠焚香。拈誦佛經。守者詰之。流涕曰。吾儕海塘夫耳。酌以茶。泥首公像前。曰。力非不能具牲牢。醵錢恐傷公心。公不要民一錢者也。如是十數年不絕。子良模竄遠知縣。鴻赤舉人。敦仁山西翼甯道僉事。降汀州府知府。

李文藻曰。予少時聞人言。公守郡道事。惟恐其辭之盡也。公嘗冒雪過鄉官馮協一家索飲。協一為言民害數事。立除之。或布袍棉鞋行市井。民所苦樂無弗知。既引疾。僦居府治南民宅。父老獻蔬米者。日闌於門。被

召赴都。民罷市。遮留三易期而不得行。乃夜從二僕。自持鑰啟城東門去。質明民爭追之。無及矣。當時肖像范公祠之後樂亭。蹟久圯。而北郭汪公喬年祠前。公之去思。



碑在焉。予讀碑略得公名實。近客濟南。復交公之孫濟陽知縣調元。悉其世調元出家傳。俾予第之。嗚呼。吾郡之民。猶然俞公之民也。今往往以事控臺使。擊登聞鼓矣。或者謂青州民悍黠。樂訟無仁恩。乃當俞公時。何其彬彬然有情禮哉。

原文

余廷燦

文者肇於太極。胎於陰陽奇偶。產於圓頂方趾。四肢五鑿。端倪於惻隱羞惡辭讓。是非炳蔚於君臣父子夫婦昆弟師友賓主。散見於谿谷牝牡華實珠璣。踐行喙息。蠅飛螻動。薈萃於易象詩書禮樂春秋。孝經論語孟子。文其不可以已。而自流形者。故天有所不可已。而後二曜五緯三垣列宿。眾星形於亘古者。爛乎其有章焉。地有所不可已。而後五嶽四瀆九州名山三百支川三千。形於亘古者。粲乎其有理焉。矧是人文。宣洩元黃。淪浹肌髓。符契性命。綱紀倫理。厯堯舜禹湯文武之制作。皋陶伊萊望散周公之佐佑。孔子之金聲玉振。顏子孟子之春溫秋肅。繩繩繼繼。穆穆皇皇。靡不因自然之文。庾續利導。而益之則懼其為偽。為支。遏之則懼其為閼。為鬱。蓋始自一而二。二而四。四而八。而各自其八。而生生不可已。至於生生不可已。而繁會者自有其統壹。雜糅者自有其剖辨。而至文寓焉。而大文呈焉。是故江淮河濟。莫曲折於禹之文。然不過因水以為師。春秋冬夏。莫精析於堯之文。然不過因寒暑以為師。易象詩書春秋。鈎深際遠。大載小破。至於光燭六合。聲振八紘。然不過因其不可以已者。以為師。天地有無色之色。無聲之聲。無體之體。人色無色之色。聲無聲之聲。體無體之體。而文即以色無色之色為色。以聲無聲之聲為聲。以體無體之體為體。是

故其筆畫之繪為形容曲折也。則頡制字而鬼哭也。其響簫之激為節奏揚抑也。則倫吹律元而鳳踏也。其結構之遇方成矩。遇圓成規也。則姬旦之面。朝背市。左祖右社。而九經九緯九涂。無有遠近幽明。莫不絡續奔赴。受享奉職也。未有文而天秘其高。地秘其險。日月秘其光。山川秘其富。人秘其性情。而萬物秘其繁賾。自有文而天效其章。地效其理。日月效其光華。山川效其動靜。人效其秀靈變化。而萬物效其幽遐瑰瑋。文固盡人性以盡物性。而參天兩地。成位乎中者也。管子書謂五方之民。其聲之清濁高下。俱各象其川原泉壤淺深廣狹而生。然則清濁高下。固川原泉壤之不可以已者。而聲因而肖之也。夫人文之於天地亦若是而已矣。故有文則安。有文則治。無文反是。然過之不可謂有文。蓋之亦不可謂有文。歷周末秦漢唐宋元明中更六朝五代。一一不羞銖黍。蓋敷而為文也。與其默成於身。施被於事也。一而二。二而三。三而一。若鼎之有足。然而缺其一。則岌岌蹢踉。不可以安者也。後人謂文以明道。謂文以載道。又謂文士浮華。無與於道。夫文外無道。文即道也。孔子言道則不言文。言文則不言道。彼淺之測文者。文之不知矣。於道復何有。

### 慎微

通於物之性而制之者。其神乎。神農氏通百草之性。妣氏通百川之性。稷通百穀之

性為之劑而用之利而導之物土宜而布之是以疵厲和高下莫榮衛滋使是三者咸止其所止而不過乎物然神農氏能制藥之性以扶疾不能兼制醫之不小誤於燠寒稷能制百穀之性以養生不能兼制民之偶不時其饑飽禹能制水之性以注海不能兼制防之不乍潰於蟻穴綫露吁嗟江河有時泛溢直潢汙之不如矣參朮有時殺人曾蓀苓之不若矣稻粱有時伐性且萑稗之不如矣而其患皆自微始豈三聖人之智有所及復有所不及耶其亦可制之數止於此而智有所窮心有所待耶吁此聖人所以不憑已然之效不徵可見之迹而必防其微謹其幾常與天下同其憂患然後調陰陽翕河獻拯饑溺而與斯民相濟於無窮也

### 民貴

厥初萬物權輿與元黃同剖判者其圓頂方趾之民乎民質也有因民之質而文之者則曰聖賢民萌也有因民之萌而達之者則曰君相二者非有異於民也以民明民也以民衛民也非用民而為民用者也此天地之心也然治民者且曰民賤何異足曰薦地而不思去地則足懸無所附雖有飛廉跨空之足僅仆頓踣而已矣何異魚日在水而不知水涸則魚相與處於陸雖有橫海之長鯨螻蟻治其命而已矣楊雄氏曰周之士也貴然文王武王周公之貴民也亦明矣愛其子者隆其師貴士正

國朝文匯

卷三十二

九

國學扶輪社印

所以貴民也。寒其足者傷其心。民不貴即士亦不可得而貴也。明人燭三百年天下之力。顯顯奉數十百褒衣博帶之士。夫此數十百褒衣博帶之士。其不及姚姒子姬孔孟之聖與賢可知也。姚姒子姬孔孟之聖與賢。天所新而不輕生者。然及其既生。天亦止欲其護吾民耳。貴姚姒子姬孔孟而於吾民夷然不屑。尚謂達天。奈何哉。然絕吾民於士。一以為珠玉。一以為糞土。小民方與相為仇敵。雖欲長與士共天下。其可得哉。今夫投棄詩書。家必敗也。固也。秦之賤士是也。今夫歌誦詩書不絕口。與之觀濤涂川澮。譚黍稷桑麻。則吐棄如臭惡。是直墮天地之性。而棄生人之命也。又豈真能歌詩誦書者哉。

節烈辨

女子以身許人。其重無加者。節而已矣。其切齒椎胸屈折以之死者。皆求其不失節而已矣。節不必皆烈。而烈止所以成其節也。節固窮天地亘萬世而無以易者也。予讀歷代史傳。自唐以前。其女子之近烈者。無若皇甫規妻之立罵董卓而死。呂榮之手斷仇頭祭夫。旋因賊逼而死。而後漢史皆書為某某妻。其書為某某妻者。猶春秋之繫叔姬於紇。繫伯姬於宋。以完節予之也。至唐書始稱烈婦者。二而二婦皆非殉死也。一以護項城於寇。至一以脫夫難於仇手。此固史家之因事起例。而其他之引

刀斷指立舟罵賊如樊彥琛妻如符鳳妻之斬斬立死者又未嘗不以其節而統之也然則清操終其身而不遽死者將何以別之耶曰清操終其身者甘節也倉皇引決者苦節也聖人繫易甘者苦者固明統之以節矣今必謂從容者書節而慷慨者書烈將教人以節耶教人以烈耶則烈不可垂教以節教人則烈亦為吾所美而其美且若過於節是使女子之守義者節則遺烈烈則遺節於彼於此無一得有全美者也且謂從容者不得為烈亦將謂慷慨者不得為節哉故曰莫若統之以節統之以節則吾之期天下以必至者止此而其人之安車而徐至與重轡頓足備歷艱辛而至者惟天下之所以而吾第問其至不至初不問其何以至其為教不益明乎蓋節者心也烈者迹也節者理也烈者氣也迹以明心氣以輔理君子原心據理亦從其重者立言而已矣然則烈當諱耶曰據事直書而烈自見也蓋桂可以一用而不可以常用良醫者未嘗教人以常用而詳著其性亦不廢其材故天下之利其用也仍與參朮同功此作史者所以有綱目之分也韓歐蘇曾諸大家文集特無列女傳耳自元明來以古文命世者多膠固於節烈二字循俗標題破析體例究之舉其偏而遺其全而於經史義法曾未有以合也予作江慶璜妻傳直書江節婦而詩人潼關楊子安桐城石聞孫以詩來皆署為江烈婦二君博雅君子或別有所

據惜道遠無由是正也作節烈辨。

明指揮使謝公承任事傳後敘

茶陵謝生國楚以其先世指揮使謝公承任死事桂陽縣志傳及詩歌棠為一帙請予更繫以傳予展讀卒業辭焉已乃作而嘆曰公偏僻微弁耳天資忠孝鬱勃其心寧遂支解其體為萬山中一小縣死死既百餘年猶生氣塞穹壤而光日月當時擁專閫佩斗印擅土地甲兵坐恃貴強桀大以自便其避死趨生之計者亦復何有哉論者或曰公死事於明季不甚著非關天下之所以存亡是大不然者今夫縣無小皆王土官無小皆王臣當粵寇鍾靈秀之薄桂陽城下也若俱如縣官之縮頸宵遁則豺虎縱橫寇盜充斥直入桂陽視若無人耳天上地下有一可視為無人之處則天下豈有一無心之人哉今人惟有心自毛髮指爪之末以至呻吟疴癢之細無不隱隱脈脈呼吸相貫而後其人不死況人者又天地之心也無心貫一身不可以為人無人貫天地則天地又何以與立通是說也亭障堡戍中一老校贏卒皆其司命脈而與天地貫者也何況指揮使之於桂陽然無人不有是心而或禽獸其心究不可謂有心亦猶天地間無處不有是人而或鬼蜮其人亦究不可謂有人嗟乎此則惟公之人所以貫天地而天柱地維所賴以立者也其人雖已死而其人為天地之

心之人則天地之心乃亘萬古不磨者故其人雖死而常生而斷非戈兵水火所得而死之亦斷非膏粱文繡所得而生之也曩令明之縣邑隊伍皆得如公之人心公之心以為天地立心則縣邑隊伍皆隱然重鎮強國豈復有今日破某城明日又破某城者哉夫一身者一肢之積天下者一縣之積也若林大傳之棄桂陽如敝屣第脛指不可屈伸耳然人一二指搯即身慮亡聊宜公之疾痛相關與身俱赴者嗟乎自公之死十有三年為思陵癸未閩獻橫驅郡邑望風瓦解當是時明之天下錮疾不仁雖扁鵲不可為治大率皆由林大傳輩積而成之耳然與其由林大傳輩積之而亂何如由公與蔡江門一輩人積之而治哉予考春秋之義事關疆場者雖微必著因反覆是悞不能已於言乃就觀察李公拔傳敘而還之謝生以副其請亦以見得失之林有如此者



# 氣勢

崔述

凡戰義為上。勢次之。氣又次之。關為下。奉天討罪。伐暴救民。是之謂義。義立者。王據山河之險。通饋餉之利。批亢搗虛。以逸待勞。是之謂勢。勢利者。霸臨陳決機。勇怯並奮。乘驍待敵。使敵自潰。是之謂氣。氣盛者。勝矢鏃劍鏑。撞櫓搏刺。力盡而後斃。是之謂關。關數者。傷湯之征也。曰。僅我后。武王之征也。曰。紹我周王。用義戰者也。亞夫堅壁於昌邑。鄧艾絕師於陰平。用勢戰者也。曹劌以一鼓破齊。項羽以沈舟救趙。用氣戰也。勝負之道。無眾寡。無強弱。氣而已。氣之既衰。強弩不足以穿魯縞。賁育不足以抗童子。用兵者。用其方銳之氣。而外察敵氣之盛衰。盛則避之。衰則乘之。驟勝者。其氣驕。新敗者。其氣怯。轉關不食者。其氣餒。久攻不克者。其氣弛。間內有變者。其氣搖。倉卒遇敵者。其氣亂。乘而擊之。一可以當百。弱可以制強。是故用關不如用氣。有必取。有不必取。有必勝。有不必勝。勢也。項羽百戰百克。而卒為漢王擒者。羽用氣。漢用勢也。漢王守成臯。以抗天下之吭。使韓信取河以北。而羽之右臂斷矣。南連英布。而羽之左臂斷矣。故楚卒滅於漢。汴之於河東也。猶漢之於楚也。克用破黃巢。王行瑜等所向無敵。然朱溫以輕兵襲晉絳。斷長蛇之腰。而克用坐視河中之亡。而不能救。終克用之世。不復能南爭中原者。失河中故也。氣也者。可以決一日之勝負耳。至

於定天下之大計者。必以勢。是故用氣不如用勢。可以勝天下。而不可以取天下者。不知勢故也。可以取天下。而不可以安天下者。不知義故也。漢之於楚。汴之於河東。皆制勢以挫其氣。然漢遂滅楚。而汴後反滅於河東者。漢有義。汴無義也。漢雖無湯武之義。然義於楚者三。漢仁羽暴。羽弑義帝。漢發喪討之。漢當王閭中。羽負約也。克用再造唐室。不失臣節。而溫篡唐。克用救溫。而溫負克用。其見滅焉宜也。故用兵者。曰。逆取順守。非知兵者也。逆不可勝。逆勝幸也。義立於素。而輔之以氣勢。則無敵於天下。

### 訟論

天下之患。莫大乎其名甚美。而其實不可行。白圭二十而取一。孟子曰。欲輕之於堯舜之道者。大貉小貉也。許行使市賈不貳。孟子曰。物之不齊。物之情也。巨屨小屨同價。人豈為之哉。聖人非不知薄取民。而一市賈之為美名也。顧以其勢斷不能行。姑取其美名焉而已。而人心風俗必受其大害。是以其論常不敢過高也。自有生民以來。莫不有訟。訟也者。事勢之所必起。人情之所斷不能免者也。故傳曰。飲食必有訟。柳子厚曰。假物者必爭。爭而不已。必就其能斷曲直者而聽命焉。訟之來也久矣。舜避堯之子於南河之南。天下諸侯訟獄者。不之堯之子。而之舜。魯叔孫昭子受三命。

季平子欲使自貶。昭子朝而命吏曰。姑將與季氏訟。書辭無頗。唐虞之時何時也。諸侯猶不免於訟。昭子賢大夫也。亦不能以無訟然。則是訟也者。聖人之所不責。而亦賢人之所不諱也。兩漢之世。好言黃老。始有以不與人訟。博長厚之美名者。然亦其時風俗淳古。故得以自安於閭里。唐宋以降。日以澆矣。乃為士者。幸藉門戶之蔭。不見侮於市井小兒。遂以人之訟者。為卑鄙而薄之。而憚於聽訟之吏。因遂得以是藉口。有訟者。則以為好事。怒之責之。而不為理。嗚呼。是白圭之取民。而許行之治市也。何以言之。凡有血氣。皆有爭心。必此爭。而彼甘於讓。斯已耳。苟不甘於讓。則必訟之矣。故陵人者。常不訟。而陵於人者。常訟。其大較也。且爭而甘於讓者。惟賢與孤弱者耳。然理固有當讓。有不當讓。勢固有能讓。有不能讓。所爭者。非一人之得失。則不當讓。讓之而爭者。不已。讓之而爭者。得逞。人皆從而效之。則亦不能終讓。故雖賢與孤弱者。亦不能盡無訟也。夫使賢者常受陵於不肖。而孤弱者常受陵於豪強。而不之訟。上之人猶當察而治之。況自來訟而反可尤之乎。今不察其曲直。而概不欲使訟。陵人者反無事。而陵於人者反見尤。此不惟賞罰之顛倒也。而勢亦不能行。何者。人之所以陵於人而不與角者。以有訟可以自伸也。不許之訟。遂將束手以待斃乎。抑亦與之角力於蓬蒿之下也。吾恐賢者亦將改行。而孤弱者勢必至於結黨。天下之

事從此多。而天下之俗從此壞矣。余幼時見鄉人有爭則訟之縣三十年以來不然。有所爭皆聚黨持兵而劫之曰。寡使彼訟我。我無訟彼也。唯單丁懦戶力不能抗者。乃訟之官耳。此無他。知官之惡訟而訟者未必為之理也。民之好鬪豈非欲無訟者使之然乎。逮至近年風俗尤敝。里巷之間。別有是非。反經悖律。而自謂公。以鬪傷為偶然。以劫奪為小事。立後則疏族與同父無殊。爭田則盜買與祖業不異。推此而論。不可枚舉。至於姑殘其媳。弟侮其師。竊田禾毀墓木。尤恬不以為怪。訴之宗族宗族以為固然。訴之里黨里黨以為固然。彼固不識字。即識字而亦不知律為何物也。不得已而訟之於官。則官以為好事。而里黨亦共非之。是以豪強愈肆。而善良常忍泣而吞聲。無訟則無訟矣。吾獨以為反不如。有訟之猶為善也。昔韓文公為都縣。雅重盧仝。仝為比鄰。惡少所苦。使奴詣縣訟之。公不惟不薄仝。反稱其賢。而自引為已罪。彼韓公者。豈獨喜人之訟哉。誠少歷艱難而悉寒士之苦故也。然則今之君子。或亦生富貴之中。席祖父之勢。居仁里處順境。未嘗身雜保傭。目覩橫逆。故不知涉世之難。而妄為是高論耳。不然。何其不近人情。乃至是也。或曰。予未覩夫訟之害耳。書役之魚肉。守候之淹滯。案牘之株連。有聽一人一朝之訟。而荒千日之業。破十家之產者矣。況有訟而誣焉者乎。曰。此誠有之。然此誰之過耶。苟官不謹其下。書役安得而

魚肉之訟至而即聽當逮而後逮之何淹滯株連之有哉此乃已之不臧反欲藉口以禁人之訟可乎且訟而果誣反坐之可也不治誣者而遷怒於他人而禁其訟是使直者代曲者罹殃也。值孰甚焉。曰孔子曰聽訟吾猶人也必也使無訟乎。然則聖人之言亦非與。曰大學釋之明矣曰無情者不得盡其辭大畏民志然則聖人所謂使無訟者乃曲者自知其曲而不敢與直者訟非直者以訟為恥而不肯與曲者訟也。若不論其有情無情而概以訟為罪不使之得盡其辭曰吾欲以德化民是大亂之道也。且無訟之治聖人猶難之今之吏豈惟無德且貪莫甚焉民之相爭固其所也而欲使之無訟舛矣。

### 贈陳履和序

聖人之道在六經而已矣。自周之衰楊墨並起繼以秦火六經幾亡。漢初始求遺書然以其求之切也傳而失實駁而不純者皆得託為聖賢所作以與世市而莫能辨。武宣以後經學益重學者藉此以取富貴又多增其師說旁采楊墨之言以亂聖人之旨。猶幸其時諸家並立異同得失之故有可考證及至後漢馬鄭起而諸家之傳漸微永嘉之亂其書遂盡矣存於世者不一二家而學者方崇王肅復偽造古書以攻康成以惑當世後生末學習熟耳目以為聖人之旨固然六經於是大壞唐宋之

興諸儒林立。始發明聖人之道。然其言大抵以闡佛老為事。至於前人訛誤。素難相承。而未及正者尚多。此固未嘗不有待於後人之補苴者也。余自束髮受書。奉先人之教。即專求信於經。及長。覺百家言益多可疑。以是每觀先儒箋註。必求其語所本。而細核之。欲以探聖經之原。不惑於眾說。顧家貧質鈍。碌碌無讀書之暇。嘗冀有一二同志。相與講明。而切究之。而居僻寡交游。所見學者。多專攻舉業。間有好古之士。祇肆力於詩賦博覽。竟不能有所遇。而余亦漸老矣。乾隆壬子。余游京師。始得遇漢中陳介存。履和於逆旅。介存嗜學好古。所為文。往往能挾前人舛誤。余方幸其得友。而介存顧不自是。乃介朱笏山奕簪而請師余者。至於再四。夫師以求益。余之於介存。伯仲間耳。何能益。況師道不易行。自唐韓柳且難言之。乃辭之者屢。而介存竟堅不可移。豈以世無行古人之道者。而欲以身勵俗耶。抑好學之心篤。而還不暇深擇其人耶。雖然。余嘗聞之。學以專而精。知以少而當。不使百家之言雜於經。而後經之旨可得。不強求其所不能知者。而必欲知之。而後所知者無所淆。故說經欲其自然。觀理欲其無成見。於古人之言。無所於必從。無所於必違。唯其適如乎經而已。苟如是。異日必將大有得焉。於以正羣言之淆亂。而明六經之旨。余將於介存乎。是望而如余者。復何足為芥蒂哉。倘異日天假之緣。使余得與介存聚首數載。以余之所窺。

及其所未窺相與講明而切究之以償其生平之願求萬一之有幾於道則余雖貧且老其亦可以無憾也夫

仲簡譚君傳

倪賜

君姓譚諱廷奎字鉉玉別號曰仲簡常熟東唐墅人父諱文富以孝行推重鄉里生六子君其仲也幼開敏出就外塾不煩於師弱冠即工經生藝而以慕古不利童子試遂闢一室嚴扃門戶取中經四部矻矻蒐討至鐙地漏殘乃就寢又龍一司晨雞於牀下聞喔喔聲即起讀無寒暑以為常所為文步趨先正終不改其故智也年二十五始受知學使者銅仁張公補郡學生自此秋賦者十中間僥得而復失之士友為扼腕君恬然不滑其和先是紅橋許司馬聘君訓其子繼應見復陳司業聘課其孫司業常語人曰譚生不特學有原本可為經師其篤行更可為人師蓋深知君至性過人也君事親謹謹致孝歲入束脩羊織毫必上其父母父性嚴一不當意輒色變君屏息侍側俟霽顏方退後父以衰年居母喪哀毀致疾君奉湯藥身不帖枕席者累月迨疾革刺血籲天祈身代不應君五色無主潛剖肱肉作羹進未下咽而形神離矣其治喪也擗踊苦志無日夜三年不御酒肉春秋時祭向隅飲泣恐傷母心也喪母如喪父時有兄負豪家金五百不能償君率諸弟縮已硯田代償之與人交謙下而誠信不隱善不揚惡歲壬申以予家兄弟可結鄰也卜宅涇西如形影甲申春先兄謝世予哭之慟君哭之亦慟嗚呼今又哭君矣君卒於乾隆乙酉歲七月十一



日距生於康熙壬辰歲年五十有四配吳氏子一式金女二長適諸生史慶全亦餐和染教於君者次適蘇瑾君餘事能詩隨手輒散去君歿後史生拮拾繕寫藏於家

### 張烈婦傳

烈婦吳氏東唐野張樹功之妻歸十年樹功暴病卒烈婦即欲自經從姑諭之曰汝有孕幸生男延汝夫一脈烈婦聞遽懷然止越五月遺腹生子名堯年於是日以撫孤為事矣樹功之弟鶴山向與樹功同居娶施氏頗賢似婦間相敬愛絕爾汝之指居久之婦氏死鶴山繼娶某氏悍甚奴婢視烈婦母子事無大小壹婢遺之烈婦無幾微愠色小姑諷之曰歲月遙遙嫂何自苦烈婦指堯年含淚答曰我所以偷生者戀此一塊肉不敢重違從姑之語耳且女子從一而終我至此斷不出張氏門限也小姑俛默而退而子歲許饑悍婦以食指繫凌辱烈婦愈酷意必奪其志鶴山亦非以婦人之言為不可聽者烈婦覺之乃痛哭告堯年曰汝今年九歲饑寒可自知我將舍汝從汝父於地下堯年性魯不知其母之言為永訣也而預防之烈婦竟闔戶自經死時年三十九歲

野史氏曰烈婦死三年鶴山卧病見其妻則罵詈不絕口見堯年則嗚咽涕泣又時時索帶作自縊狀舉家知為烈婦所憑鶴山死不三月悍婦改適匪人未期得惡疾

死觀此敢云天道夢夢哉

王貞女傳

貞女王姓父受之母劉常熟唐墅里人貞女生有至性幼即知敬父母父母極憐愛之年十四許配同里柏姓子煥文越九載合卺已有期煥文暴病亡訃聞貞女決志身殉雖經牀後父救得免母同起居防護誓絕粒父母多方慰諭不食鄰有媿婦謂曰汝甘身殉無甯生守擇立嗣子延汝夫一脤古云死易立孤難汝當勉其難者貞女悟歔歔請奔喪父母知不能奪許之而柏姓亦以為宗族之光也來逆遂鬢經往見夫恣拜仆於地慟絕復蘇至再至三見者為酸鼻痛定自擇柏士達之次子為嗣煥文喪葬訖家無長物遺賃屋半間在閭閻中市聲喧呶非寡弱可棲止貞女歸依父母獨居一樓勤織作昧爽而起至更闌鐙地機聲猶軋軋父母勸少休貞女曰苟不銖積寸累使嗣子成立何以見逝者於地下居久之嗣子授室適生子貞女已抱孫凡族戚有吉禮皆不與女紅之隙焚香禮佛無笑容無疾聲履不踰閭二十餘年如一日歲丁未父寢疾貞女侍湯藥捐餐廢眠者彌月洎殯號哭恐傷母心向隅嗚咽飲泣過時而悲竟以毀悴成疾母謁醫診治堅辭之疾時作時止庚戌秋病大作交季冬革矣預言死日屆期果卒彌留中執母手曰從此永離膝下阿孃年老善自

保重勿以我為念。呼嗣子囑曰。汝今有屋一廬。田數畝。可安居守業。須以義方訓子。我死速埋於汝嗣父之冢。生未同室。死得同穴。我志畢矣。嗣子聽而受命。貞女瞑而受舍。在乾隆五十五年十二月十四日。得年四十有八。殮後。嗣子即舉柩合葬於煥文之冢。成貞女志也。嗣子名廷魁。孫二。學孝。學明。

贊曰。女子未嫁夫死。服衰往弔。既葬除之。禮也。守貞不字。從一而終。此禮之變也。能立孤以綿夫氏既絕之緒。此變之正也。夫貞也者。正也。王貞女可謂得其正矣。

三國志辨疑自序

錢大昭

史有二體紀傳編年是也紀傳中有二體陳氏三國志李氏南北史之與諸史是也諸史中班史約而仍明略而勿陋敘事最為肅括蔚宗史才已不逮古而自稱體大思精自古未有者蓋謝承華嶠司馬彪諸書並在范前取資既多用功益密又因而非創易於措辭也陳承祚之於三國疆宇鼎立地醜德齊兼之互相詆毀各自誇張斯其載筆誠難折中又列國雖有史錄多詳魏而畧吳華曹而陋蜀其匪而修成一史者承祚為創是以用力尤難乃能彙實錄小說家之所言有條不紊類事無頗宜乎時人稱其善敘事有良史才范曄等表稱辭多勸戒明乎得失有益風化而夏侯惇張華輩並相推重也裴世期鳩集群籍以注此書其所徵引於漢有華嶠謝承後漢書司馬彪續漢書張璠袁彥伯後漢紀劉艾靈帝紀獻帝紀袁思光獻帝春秋樂資山陽公載紀孔衍漢魏春秋習鑿齒漢晉春秋獻帝起居注獻帝傳於蜀有譙周蜀本紀王隱蜀紀孫盛蜀世譜於魏有王沈魏書吳人曹瞞傳郭頒魏晉世語孫盛魏氏春秋魏世譜魏世籍魚豢魏略陰澹魏紀毋邱儉志紀魏武故事魏名臣奏於吳有張勃吳錄胡冲吳歷韋昭吳書環濟吳紀於晉有王隱虞預晉書干寶晉紀習鑿齒晉陽秋孫盛晉陽秋陸機晉惠帝起居注李軌秦始起居注傅暢晉諸公贊於

國朝文匯

卷三十二

十八

國學扶輪社印

地理有司馬彪九州春秋荀綽九州紀虞預會稽典錄趙岐三輔決錄摯虞三輔決錄注常璩華陽國志王範交廣二州春秋王隱交廣記左思蜀都賦魏都賦庾闡揚都賦太康三年地記襄陽記於人物有皇甫謐帝王世紀高士傳逸士傳烈女傳魏文帝列異傳王粲英雄記張隱文士傳葛洪神仙傳周斐汝南先賢傳張方楚國先賢傳陳壽益都耆舊傳陳衍益都耆舊傳蘇林陳留耆舊傳虞溥江表傳零陵先賢傳先賢行狀漢末名士傳魏末傳於官制有山濤啟事無名氏晉百官名志晉百官表裴賞令於襍書有顧愷之啟蒙法晉武帝中經簿荀勗晉中經簿張儼默記張華博物志東方朔神異記楊孚異物志干寶搜神記傅休奕傳子葛洪抱朴子袁準袁子劉向說苑新序衛恒四體書勢序殷基通語陸氏異林應璩書林虞喜志林司馬彪戰畧應劭風俗通徐衆三國評孫綽評將濟萬機論孫盛異同評異同襍記魏文帝典論決疑要法於文章有摯虞文章志荀勗文章敘錄於別集有孔融高貴鄉公陳思王植嵇康石崇潘岳諸葛亮姚信王朗傅咸張超等集於家傳有王朗傳暢荀氏廬江何氏會稽邵氏等族又有杜氏新書山濤行狀袁氏世紀裴氏家記陸氏世頌陸氏祠堂像贊於譜牒有孫氏嵇氏劉氏王氏諸葛氏庾氏阮氏孔氏陳氏郭氏崔氏諸譜於別傳有濟北王志鄭康成荀彧補遺邵原吳質劉廙任叔孫資王

弼松康華陀管輅趙雲費祿虞翻諸葛恪荀勗程曉潘岳潘尼孫惠顧譚盧湛鍾會  
母張氏陸機陸雲諸家外此羣經傳注倉雅詁訓方言土語諸子百家之說無與史  
事而引以詮釋字句者又不下數十種夫世期引據博洽其才實能會通諸書別成  
畦町若依後世新唐書五代史之例可自作一史與承祚方軌並駕乃不自為而為  
之注者讓也竊嘗論之注史與注經不同注經以明理為宗理寓於訓詁訓詁明而  
理自見注史以達事為主事不明詁訓雖精無益也嘗怪服虔應劭之於漢書裴駰  
徐廣之於史記其時去古未遠釋官載記碑刻尚多不能會而通之攷異質疑徒多  
爰於訓詁豈若世期之博引載籍增廣異聞是是非非使天下後世讀者昭然共見  
乎予舊於兩漢書有辨疑四十四卷於地理官制頗有所得名儒碩士時或許之近  
日復於三國志輯錄得三卷仍仿漢書辨疑例不敢立議論以測古今不敢妄褒貶  
以騁詞辨而其詳略不能與漢書盡同者蓋史事藉注證而申兩漢之法簡則易  
滋疏略三國之注博博則疑義鮮存有無待辨證而明焉者也雖然校書如掃落葉  
隨掃隨積以予之見聞有限無論志中罅隙更俟補苴即拙著內亦豈無紕繆待指  
者漢書刊誤所望吳斗南為之補遺云

春秋書法論一

袁穀芳

春秋者魯史也。魯史氏書之。孔子錄而藏之。以傳信於後世者也。而說春秋者。乃以爲非孔子莫能作者。非也。昔者列國皆有史。匪直魯也。列國之史官皆賢者。亦匪直魯也。晉趙盾弑其君夷臯。晉董狐書之矣。魯史臣亦從而書之。齊崔杼弑其君光。齊史臣書而見殺者三人。南史氏且執簡而往矣。魯亦書之。職如是。故直書之而無所忌。寧殺其身而必不敢以稍私也。韓宣子適魯。觀於太史氏。見易象與魯春秋。曰。周禮盡在魯矣。則魯史氏之賢。能世其官。修其職。可知也。孔子曰。吾猶及史之闕文。孔子之時。春秋猶足爲信史。幸其爲信史。而又懼後世之亂。臣賊子將有忌之而去其籍者。於是私取而錄之。以附於易書詩禮之後。信傳信。疑傳疑。闕其疑而益信其所可信。俾萬代之下。知東遷之周。王命不行於諸侯。而正名定分。史官得據事直書。以昭示法戒。則亂賊即不畏君父。不能不氣奪於史官。此則孔子之功也。齊之化而爲田氏也。晉之化而爲韓趙魏也。其他諸國亂者亂。滅者滅。篡逆之子。兼并之徒。皆眈眈焉。忌其國之有史。而史亦因以不傳。魯無齊晉之霸。而其臣之強。幾與齊晉等。其史乃得至於今不廢。豈魯之微弱不能存其國。而獨能存其史乎哉。故曰。孔子之錄而藏之也。錄而藏之。孔子不言也。魯之君臣不知也。論語中諸弟子問。富不及

也。迨其既歿而子貢貢之徒檢遺書而泣然流涕曰。此魯之史也。與哉。此即吾夫子之書也。於是援筆而續之曰。夏四月己丑孔某卒。而是書遂不啻為孔氏之書。後雖有亂臣賊子。力能去其國之籍。而終不能滅孔氏所藏之書。則春秋傳矣。

春秋書法論二

以春秋為孔子作。其說始於孟氏。而後儒之傳會而穿鑿之者。遂從而甚之也。嗚呼。孟氏之言。夫固有取爾也。孟氏曰。王者之迹熄而詩亡。詩亡然後春秋作。作起也。蓋言春秋之名。由此起耳。其實與晉之乘。楚之檮杌。同為列國之史。孔子以其義可以存王迹。故取之。取之而曰竊取。明國史非孔子所敢與聞也。其曰孔子懼。作春秋者。維時晦蒙否塞。人且不知有天子。而何有於春秋。孔子懼焉。取而錄之。藏之於家。而傳之於其弟子。以及於後世。而後世為天子之事者。第以春秋之義為之。而有餘則是不不得不歸功於孔子。功在孔子。則即以其書屬之孔子。而曰孔子作春秋。不為過使非孔子。則是書之亡久矣。而今日尚知有春秋哉。然而竟以春秋為孔子作。則斷不可。今有人以草野韋布之身。而私取國家之史筆削之。而加以予奪焉。是愚自用賤自專也。幾何其不為僂民耶。孔子雖大聖。韋布而已矣。雖嘗為大夫。終不得侵史官之職。若侵之已。且不免於罪。而又何以罪他人之自用與自專者哉。然而孔子則



自謂有罪我者何也。蓋春秋固治亂賊之書也。亂賊以春秋而懼。春秋以孔子而傳。治亂賊者歸功於孔子。為亂賊者必將歸罪於孔子。而究之春秋自春秋。孔子自孔子。何罪焉。若以罪我之言。為作春秋之證。是孔子明知其有罪。而復躬自蹈之。是亦不可以已乎。後世晉孫盛書桓溫枋頭之敗。溫大怒曰。若此史遂行。自是闕卿門戶事。盛子弟號泣求改。而盛不許。北魏崔浩。一時之智士。至以史族其家。彼固以為吾職也。不如是。不足以昭直筆。而取信於後。然且不免於禍。况非其職。而為其事者耶。天君子立言以明道。其於當世政事之得失。人物之臧否。原不禁其有言。如論語中。於先世則傷告朔。斥要君。諷竊位於同時。則舞佞歌雍。旅泰山。伐潁。史諸事。皆可以正倫理。而怵人心。何必汲汲焉。僭史臣之職。而復求倖免於僭之之罪乎。吾有以知聖人之必不然矣。且孟子之意。欲尊孔子之道。與禹周公之治天下等。求其說而不得。於是借春秋以實之。亦未嘗言孔子筆削而予奪之者。其變例何如。其新意何如。如後儒云云也。吾故曰。春秋非孔子作也。不得泥孟子之言。以誣聖人也。

### 春秋書法論三

或曰。魯自伯禽開國以來。即有史。孔子何不全取而錄之。胡為獨始於隱公。春秋始於隱公。則孔子始之也。以是知為孔子作也。禽之曰。書始於唐虞。唐虞以前。豈無書。

邪。詩始於關雎。關雎以前。豈無詩邪。春秋始於隱。隱以前。豈無春秋邪。特其可錄者。始於此耳。孔子道既不行於天下。思欲守先王之遺書。以待後之學者。俾後世確然信先王之可法。而其書固非我之所得而損與加。其有歲月既遠。簡策多缺。為文義不完全者。則竄慎而不錄。以徵信也。且春秋中所載盟會侵伐之反覆。隱以前無之也。五霸之強。隱以前無之也。其君臣非隱以前之君臣也。其事勢非隱以前之事勢也。則隱以後之史。其書法必不同於已往之史也。從其類焉者。錄之以見東遷愈久。而天下事愈不可為。此則孔子或有微意存焉。而乃謂平王東周之始。王隱公讓國之賢君。故始於隱公。則隱之元年。東周已四十餘年矣。何不始於惠公。而隱公自即位以至為氏之死。亦未嘗有讓國之事。何以見其賢。且孔子亦何故必以讓國為賢而始之邪。此後儒之臆說。愈呶呶愈失其真也。夫聖人之於春秋。豈有成見於其間哉。不過就其可信者錄之而已。不知而作。我無是也。孔子自言之矣。

#### 春秋書法論四

春秋既非孔子作。則何以尊之為聖經。昔王安石不信春秋。而斥之為斷爛朝報。安石以此見掊擊於儒者。儒者肯以是為非聖人之書乎。雖然。余之說固與安石之說有異。安石不信春秋。而余則深信夫春秋者也。特以為是孔子作。而因尊之為聖經。

則有不敢信者。後世專門之學。如毛萇傳詩。而謂之毛詩。大小戴傳禮。而謂之戴禮。豈詩禮即為毛戴作邪。即孔子作十翼。不敢以亂義文之書也。其正樂也。第曰雅頌各得其所。亦非別撰一樂章也。況春秋載國家之事。直書於策。而義自見。非有精微奧妙。如易理之難窺。又十二公相嬗。自有次序。亦無待於釐訂。如反魯之樂。而乃曰舊史不如是。孔子如是。則所謂舊史者。果何如耶。其毋乃有不足信者與。舊史之得諸聞見者。不足信。而必俟孔子從二百四十年之後。遙度其是非。而予奪之。乃足信與。且使孔子而果有所筆削也。則是書之中。天時人事備焉。以大聖之聰明。千歲之日。至可坐而致。何難於舊史之脫誤者。一一攷麻布算而補之正之。然而桓十七年冬十月朔日有食之。而不書曰。僖十五年夏五月日有食之。而不書朔與日。其餘有夏五而無月。冬無月而有壬申。冬十月有朔而無甲子。如此之類。即稍稍增益其文。何不可。而孔子闕之。至於今亦未嘗有以是為孔子書法者。獨於人事之紀載。其中本有脫誤之文。而必曰此孔子之意。是必有說以處此。穿鑿傳會。屈聖人以就己之臆見。而史之義例亡矣。而史官之權去矣。夫史官之權之所以重者。以職守所繫。而非他人所得而旁撓也。若以為春秋經聖人筆削。然後可信。然則自春秋而後。非聖人所作之史。舉皆不可信。而亂臣賊子之書於後世之史者。且將反唇曰。子非孔子

也。人固不信予之言。而何憚於予。是春秋以前之亂賊。因孔子而懼。春秋以後之亂賊。無孔子而不必懼也。萬世無兩孔子。則竟無史矣。而可乎。故知亂賊之所懼。懼一時之直書其事。以傳於後世。非懼後世遙度臆斷之者明甚也。然則諸儒之說春秋。盡可廢與。曰。非然也。諸儒以春秋為孔子作。則不可以春秋為經。而說之則無不可。著善善惡惡之理。以昭示史臣書法之義例。以重史臣之權。是亦作春秋者之所望於後儒者也。是即孔子之所望於後儒者也。

送黃先生擢任泉州司馬序

吾師毘陵黃先生。以名進士出宰陝之平利縣。且十年。一旦蒙

特達之知。宣召至京。寢其能。晉其秩。於是得福建之泉州府同知。行有日矣。穀芳總角時。即以文受賞識於先生。有曠代逸才之目。是行也。已為律詩五十韻。以敘舊德。識弗緩。雖然。詩所言。情也。一人之私也。有循政殊績。而鋪張揚厲之。俾天下之為民牧者。知直道之不可枉。良吏之必可為。而惕然以思。油然而勸。此則言之公。而亦文章家之職也。穀芳未敢以文章自居。而平生每聞人善。則樂道之不已。矧先生乎。於此而不用吾言。烏乎用吾言。昔孔子於門弟子。論為政。屢矣。而求其要。莫踰於學道。愛人之一語。不學道。不愛人。而察察以示明。煦煦以示惠。雖號曰能吏。亦能其所能。

而非君子之所謂能也。先生之宰平利也，不肯以能自表襮，而平利之為士者安之。以先生為明師，其百姓安之。以先生為慈父母，即其上官亦安之。若忘乎其有平利也者，至是然後士與民皇皇然無策以攀留之。曰：是安遊擊害我安遊擊者，白土關弁也。素驕恣，時以事赴京，虐使其部卒許魁，魁不堪，至京遂逃去，而與安同入都者，有夙隙。先歸言於眾曰：安遊擊殺許魁矣。眾信之，比遊擊回，而魁之母王及魁妻凶服向索魁。次日復同其兄王照女塔羅廷賢聞至營，哭且詬，羣不直遊擊者助之，勢汹汹。先生聞，馳往叱眾散，陰縱羅廷賢速逃，而執王照謂安曰：今日之鬧，以許魁若遽報上官，重公譴。且閹者二婦人，王照年八十餘，病聾，杖之恐不測。安勃然曰：許魁逃軍，宜抵罪。彼羅廷賢何為者？今不捕之，反縱之邪？某有鎮將在，無用君文官為。先生笑曰：文官不會枉殺人，抑此數人者，名不隸於軍，固平利民也。今何得不問？命縣尉牽以去，善視之。而馳白於大府曰：職抵關，惟見兩白髮人，一少婦號哭耳，不見所謂羅廷賢者。使有之，以遊擊之力，尚不能搏而繫之邪？且許魁之逃於軍，與逃於京，未可知。請緩其獄，俟獲許魁，成定讞。於是選健僕兼程赴京師，偵得魁，獻上。遊擊以此罷斥，而先生之名遂上。聞夫先生之於是事也，不過以不忍人之心，行必不可枉之道，距能逆料其事之成敗如何哉！然而

聖天子慈惠下民。慎刑矜獄。凡讞辭之上。不以大僚而屈。以從。不以一吏之微而略其善。蓋自數十年來。吏之良者無不拔。而仁政之實被於民者無不旌也。而守令中尚有媚上官。庇僚寀。草菅百姓。怙然為之。而不知羞且懼者。聞先生之風。其亦庶有悛乎。先是平利有貢生某才而貧。先生助之資。俾往肄業於成均。其訪許魁也。貢生正讀書太學中。魁之復貢。生力為多云。今先生行矣。同知去郡。守不遠。而其力亦可以行於縣令。苟有當言且行者。其尚為民毅然持之。俾泉州之民食先生之福。亦如平利也。吾知泉州又不能久羈先生。而褒能晉秩之典。將自此未有已也。穀芳雖無文。敬握管以待。

送施鐵如序

吾友西阪張先生。嘗為予言真州施子之詩。古體源於康樂。而律近乎少陵。年甚少。才未易量也。予心重之。然予不好為詩。故未即交於施君。而君則曰。不可以及吾身而失。袁子於是以詩為贊。踏門而內交焉。兩人者。自此遂相好無間。然實以疑。歎勗以不及。迄於今七八年矣。君之別予歸也。頻以書來。每有不自得語。今年秋。予客遊白門。君適以鄉試至。相見則大喜。顧不復言詩。予叩之。則慨然曰。親老家貧。詩固無所用耳。吾且憂吾之以詩窮也。予聞其言。心戚戚然動。嗟乎。君之憂予之憂也。予無

君之才。尚不自憂。乃君有才而更憂乎。予尚不能自憂其憂。而又安知夫君之憂之。果足憂乎不乎。雖然。君以予為知己。則予固不可無以起君也。予聞之人曰。造物忌才。又曰。名者造物之所忌。此皆無所得於中。而徒借辭章之末。為大言以欺人耳。若此者。吾直謂之誣天。誣天以欺人。其終困蹶而不克自振拔也。固宜。且夫人實有才。非特天不忌之。即人亦未嘗有忌之者也。其忌之者。其必不與我同類也。不與我同類。我何怪乎。爾。吾惟自信於心。以卜之天而已。卜之天而即以要報於天。又非也。天之生才甚難。而其因而篤也。如銖兩之稱。如分釐之不苟。有一世之才者。以一世報之。有千古之才者。以千古報之。若夫生一才而僅使之為詩人。為詩人而即從而當貴顯榮之。此必非天之意。而窮不窮皆無庸喜且憂於其間也。且夫天人一理也。窮達一致也。可以窮即可以達。不可以窮者亦不可以達。君試畢而歸。當益堅厥志。勵厥學。以固君子之窮。而仰承夫天所以生才之意。異日所成就必更有遠且大於今者。詩曷足以窮君哉。君即日日言詩。予且不敢以詩人目君矣。

國朝文匯乙集目錄

卷三十三

金學詩

字二雅江蘇吳江人乾隆壬午舉人官園子監助教

唐府兵得古大意論

汲黯蕭望之合論

裴度李德裕合論

知營山縣事吳君墓誌銘

知新淦縣事沈公墓誌銘

鄒方錫

字豫章號半谷一號茗溪江蘇金壇人乾隆壬午舉人有大雅堂集

五代論

南唐論

靈隱游記

月下飛來峯游記

韜光游記

龍井游記

一 二 三 五 五 六 六 六 七



雲樓游記

七

孤山路經游記

七

紫雲洞游記

八

王鳴韶

字鳳溪江蘇嘉定人鳴威弟貢生

太倉州鐘樓銅鐘記

九

錢維喬

字樹參江蘇武進人乾隆壬午舉人官鄞縣知縣有竹初文鈔

信陵君救趙論

十

水明樓記

十一

候選教諭呂君傳

十一

國子監學正董君墓誌銘

十二

張九鉞

字度西號紫峴湖南湘潭人乾隆壬午舉人官江西知縣有陶園文集

遊銅瓦寺記

十四

乾溪洞記

十四

遊楊歷巖記

十五

崇安寺六朝松記

十五

韓江樓記

十六

東麓縣新纂護城隄記

十七

洋和尚傳

十七

順德節孝婦黃氏傳

十八

偃師楊烈女傳

十九

鞏縣張烈婦傳

二十

偃師三孝子合傳

二十一

偃師任天篤九世同居傳

二十一

樂師院苦行僧傳

二十二

重修周大夫墓宏墓碑

二十三

重修畢氏先塋饗堂碑

二十四

國朝文匯乙集卷三十三

唐府兵得古大意論

金學詩

三代之時兵無專制將無專權即比閭族黨而為伍兩卒旅之師即蒐苗獮狩而為征伐擊刺之法即鄉士大夫而為將帥司馬之職是故無追呼召募之擾無團聚廩餉之費嗚呼自井田之法廢而兵與農始分而不可復合考之於史漢唐宋軍志之得失詳矣要而論之宋之禁軍不如漢之踐更漢之踐更不如唐之府兵何則府兵之制居無事時耕於野其番上者宿衛京師而已若四方有事則命將以出事解輒罷兵散於府將歸於朝士不失業而將帥無握兵之重以壯國威至強也以省國費至儉也夫民必有恆產而後有恆心有恆籍而後不敢恣肆有所係累而後不肯棄捨當承平日久兵政廢弛番易更代多不以時非法徵求分外驅役然猶未嘗有外侮內叛殺帥自擅者彼其心誠顧戀田園恐累宗族耳自府兵廢後一變為彊騎再變為藩鎮而唐遂以亡豈非以兵不土著又無宗族多忘身殉利哉雖然府兵之於古法亦僅得其大意云爾古者兵農合而不分府兵之設兵農合而弊必至於分何也於六戶中等以上家出一人免其身租庸調籍之為兵以戰以戍并分番入衛則此一人尚得復為農乎不復為農尚能如古者寓兵於農之制乎且其介冑戎具

藏於庫有所征行規其入而出給之典藏之吏因緣為姦至有利其死而入沒其財者異於古之簡於鄉師聽民自便也及其番上罷於奔命雖二千里外亦不免異於古之七家而給一兵七征而後一次更勞均逸以休養民力也顧自三代之制不可遽復後世兵出於召募以不耕之人聚於畿輔所費不貲其什伍之者無定制也教養之者無成法也通融而使之相保衛者無常心也欲求得古大意如府兵者已不可得則論兵制於井田既廢之後府兵殆猶愈乎哉

汲黯蕭望之合論

予讀史至汲黯蕭望之傳未嘗不歎社稷臣之不易得也蓋古之所稱社稷臣者不惟其有剛直之節果決之才而已也將必有寬深不測之度焉故雖處危疑孤弱之時而能使人主倚以為重小人無以抵其隙而敗其成身名並泰家國俱安何其偉歟是固非褊迫淺露如二子者之所能與於其際矣方黯之在武帝時也面折廷爭不避權貴觀淮南王謀反以為說丞相如發蒙振落而獨難黯其守節死義之概誠有可想見者當是時帝春秋高又以愛欲立少子計漢廷臣可託孤寄命者宜莫若黯右內史界多貴戚淮陽股肱郡皆非威重大臣不治其使黯也正以社稷臣待之也乃黯徒以不能留內恥為守令且因故同列位居已上形為怨望抑何所見之不

廣耶望之少治經義。儼然儒者。班史稱其堂堂折而不撓。近古社稷臣。予觀其學術。雖與黯學黃老異。然其狷介性成。與黯同。其不屑為郡與黯同。其受遺宣帝。處國危疑。亦與武帝之許黯同。乃黯不死於蚡宏。而望之竟死於恭顯。則以黯天資忠厚。雖嫉惡如仇。而能持己廉潔。以道義發意。氣人亦嚴憚之。而不敢動。望之平日廉潔正直。未盡如黯。而輕發難端。與小人以可乘之隙。固自有取禍之道也。愚故以為黯有社稷臣之概。使其得位行志。未必不如博陸侯。而無學識以化其氣質。望之悻悻自得。視黯之嚴正。抑又遜矣。然則武帝所許黯者。其去古之社稷臣尚遠。而孟堅乃并以為望之當之。不亦謬哉。

裴度李德裕合論

古大臣之得位行志。樹功名於四海者。固難乎有任天下之才。而尤難乎有容天下之量。固貴乎有幹國事之具。而尤貴乎有公國事之心。蓋自古君子與小人不容並立。而亦不能禁其不並生。惟為相臣者。用舍進退。一視乎具人之所應得。而恩怨兩有所不居。使必與小人角勝。而專權攬要。以廣樹之敵。則君子之不勝。小人其常也。敵愈久而毒愈甚。勢不至戕善類。敗國事不止。予觀唐中葉賢相。共推裴度李德裕兩人。皆君子人也。乃度能以功名終。而德裕卒至貶竄。末路成敗。較若殊科。豈果才

不逮而知不若哉。度有廣狹而心有公私也。則有黨與無黨之別也。考晉公當日恆  
鄆三鎮發難於外。王涯皇甫鏞李逢吉元稹之徒。又相與竭力擠排。以傾善類。而度  
處以坦衷。不為朋黨。竟能成大功。平大難。屢廢屢起。以其身係天下安危者二十餘  
年。與房杜姚宋並稱賢相可也。若夫衛公之相業。則亦有可觀者矣。平澤潞。禽回鶻。  
迎公主。勳名之赫奕。幾與晉公等。其始政也。亦嘗戒武宗以屏去朋黨。乃必盡逐牛  
李之黨。抑居易而引敏中。亟亟乎以門戶報復為事。何其陋也。終以顧命元勳。挾震  
主之權。一蹶而不復振。豈非平日忌刻太深。有以斂怨於羣小。故一失勢而凶邪並  
起。以快其欲者。日熾而未有艾歟。夫論古而以成敗定人短長。陋矣。然觀相臣者。當  
先於其度量之廣狹。心術之公私。度量不明。則性情之淺深。不可得而辨也。心術不  
明。則學問之醇駁。不可得而悉也。度惟胸無城府。事至而以其身出而應之。不欲以  
功名爭勝於同列。其性情學問。皆有大過人者。而德裕黨同伐異。借公議以紓私怨。  
其視權勢柄位。幾幾不可以一日去。縱所引用。半皆正人而已。不免褊衷太甚矣。况  
又有附勢之徒。反戈而攻之。於特盈保泰之道。抑又疏焉。嗚呼。自古庸臣多而能臣  
少。既已能矣。而復以學養不足。債厥事者。可勝道哉。後之為相臣者。於廣狹公私之  
間。可以鑒矣。

知營山縣事吳君墓誌銘

吾邑在前明朝門閥之盛首推吳氏兩尚書後苗裔茲茲其交於予最深者字曰惠叔一字荔香諱鍾僑與予先後同寓京師復同客閩南相得甚歡予歸里後與其兄鍾侃及弟鍾僑往還則君已沒於蜀之官舍乾隆四十八年將葬於小里港祖參圩之原鍾僑以狀來乞予為銘予先曾為君尊甫林塘先生誌墓之文已詳其世系里居故不復著云君性倜儻有大志弱冠遊京師受業今少司馬紀曉嵐先生之門先生負海內文章重望君得所指授學益進一時知名士爭折輩行與交既而就婚於蜀甫合卺值賓興之典即治裝辭行舉丙子科京兆試歷十年丙戌會試榜後揀發四川知縣歷署西充東鄉義眉鄰水四邑皆在川之東北環山糾紛地勢阨塞民復健訟君至今具牒訴者立堂下以次傳訊立剖而遣之塵牘悉清上官嘉其才而以他屬疑案檄委焉會滇省緬匪蠢動官軍進剿檄調鄰省協辦軍需君奉委星馳就道至則經理各路馬政往返逾年授營山縣令未幾朝命大將軍討金川逆酋君短衣匹馬馳赤日中抵向陽坪為西路進兵要衝飛羽輓粟轉運紛繁其中絕壑懸崖峯迴路斷索橋峭壁難若登天君善為調度安撫周卹夫役數千人咸感悅無一逃亡者即於彼地建坊顏曰邊檄甘棠云顧君之心力由是瘁而疾由是作矣時逆

首為王師所逐將帥移營深入駐阿哈木雅檄君隨營事益繁重君益自勤勉疾漸劇軍營罕良醫診治遂不起與林塘先生兩世皆負經濟才未竟其用而君年僅三十有九無子其尤可悲也夫君在京師凡十年出遊齊魯歷三山南海西入秦驅馬連雲之棧已而越荆楚留巴蜀走黔滇足迹幾徧天下喜為詩多登臨懷古之作初識予酒酣縱談恨相見晚醉坐永定橋咸屬某笑睨其旁君俟其去握予手大言曰若但能作數錢姪女守妻子老牖下耳出行萬里肩天下事者非吾輩而誰聞者駭以為狂他日竟酬其言然君後更多事彌復溫克持重與人交然諾不欺尤敦孝友之誼鍾雋好學能文章兼工法書每謂予言皆先兄之教也嗚呼此君經濟之所從出洵無愧門風也矣以雍正十三年九月十四日生其卒也以乾隆三十八年正月月初八日配張孺人嗣子某女一幼未字君所生也銘曰

平生不識馬少游間關萬里窮遐陬盤根錯節艱鉅投稜稜出匣輝純鈞中道天開逝不留招魂蜀棧歸故邱卜云其吉墓道幽特書珉石垂千秋

知新淦縣事沈公墓誌銘

文林郎知新淦縣事沈公之歿也距今十有三年矣將葬孤子梓踵予門言曰惟子與梓交久猷聞先子之出處本末惟是麇牲之石將以種諸幽窆敢請銘予謝弗獲



辭按狀公諱宗湘字六如號尊村先世為浙江桐鄉人明季遷吳江縣之小豐村曾祖某祖某皆潛德弗耀考某國學生考授州同知以行誼聞於閭黨公稟庭訓克自振勵補諸生後聲譽漸起始遷居邑城南城中多前明搢紳舊族以門閥自矜詡咸懷媚嫉而公所遷新宅即舊諸某官裔亡賴子從而媒孽焉遂控之官撤其門廡以是擲掄之未逾年為雍正乙卯公登鄉薦明年乾隆丙辰聯捷成進士向之擲掄者咸內愧不自安然公不與校也既廷試列二甲銓注山東禹城縣遭母喪未及之任服闋簡發江右授新淦縣以議刑名事忤上官意謝病歸淦人德之攀轅泣下謂令長雖痛吾民肥矣茲淦厓三載善政不勝書而其大者則在收漕一事漕之在淦者每歲額輸四萬餘石漕船皆泊會城由縣倉運至省倉以達於漕幕友家人絡繹分布加以運船之盜竊旂丁之需索所用不貲非浮收餘米不足庾費行之數十年納戶相安不以為怪公力持不可大書揭示倉場嚴禁胥吏謂稍有染指即若輩從而效尤民之被累有不勝言者甯為吾一身累耳三年中所虧數千金稱貸不給至罄家產以償無怨嗚呼瀕江州郡皆財富最甚仕者率以漕多之區為善地以事上官則秩遷以贍身家則橐富然其勢必倒持太阿授權胥吏由是土豪市儈因緣為奸晉如鼯鼠惴惴焉慮有他變甚或褫冠脫履觸刑辟向所掎克俄焉冰消吾見亦多矣

以視脫屣五斗俯仰自如。遺後人以安者其得失可道里計耶。公內行醇篤。飲人以和。自少以能詩名。在新淦愛其山水之勝。當春秋佳日。聽漱玉坐雲濤。吟嘯其間。喜形篇翰。觀者不知為簿書長吏也。丁卯分校鄉闈。得人稱盛。歸里後。應聘主笠澤書院。山長講學論文。娓娓不倦。暇與邑中諸耆舊結歲寒詩會。慕之者指為香山洛社中人。平生著述甚夥。皆手定存稿。臨終舉以付梓。梓泣而志之。藏於家。公生於康熙二十七年九月二十七日。歿於乾隆三十六年九月初六日。得年八十有二。配顧孺人。先公三年歿。子二。長楓。國學生。早卒。次即梓。邑庠生。女三。一適國學生朱遠。聞一適貽封奉政大夫刑部陝西司郎中李光運。一適庠生周瑒。孫男四。兆熊。昌燕。保魯。雲羹。孫女三。曾孫男一。履莖。銘曰。

古稱廉吏而不可為。而可為兮。載鶴歸來。西江之水清且漪兮。有子象賢。詩書之澤久而垂兮。我銘吉壤。質實不文。無諛詞兮。

五代論

鄒方鋸

或曰五代之君之取天下也皆以武力攻取篡弑劫奪而倖其成功故區區五十餘年更八姓十三君不旋踵覆身亡國豈非得之暴而失之易與顧攷之元明以前有天下者大抵乘機度勢智取術取而得之非有深仁厚澤涵濡積累自致人心天命之歸者也莊宗手除篡逆復唐社稷其得國於古為正梁晉漢周合符同軌取之誠逆矣然視前此假受禪而盜竊神器者未有以異也乃不旋踵覆身亡國豈惟取之者之不以其道哉夫亦未知所以守之者也漢陸生誚高祖曰陛下以馬上得之甯以馬上治之乎故取天下者當以力而其所以守之者則必有深仁厚澤及乎民文章禮樂以漸濡其內政教號令法度紀綱維持防檢於其外譬之作室者厚其基焉度材而任以梁棟焉而後墉瓦甌甃樽榱榱榱乃得有所施而附之以立仁義禮樂治天下之基也政教號令法度紀綱所以撐持天下之具而為治天下者之梁棟也彼五代之君其日夜計謀思慮一出於詐力攻取之為斬伐誅夷之慘一旦竊神器而有之方以制天下而屈服臣民其道未有以易此而又幸其時稍息倉侈逸欲中於其隱顛倒沈溺習焉而不悔古昔聖王所為仁義禮樂法度紀綱潰敗漸泯久而有不知其為何物者如是而欲其不亡也得乎周世宗取淮南定隴蜀復三關幾於

國學扶輪社印  
渾一區宇而議禮定樂慨然有為使天獲永其年輔之以莊士碩儒從容討論斟酌古今掃除末代之失而復斯世於唐漢之隆豈不卓然一代之治哉乃周臣之列於史者王朴鄭仁誨扈載三人其足與議國者朴一人而已又不幸不祿世果無其人耶抑當日東西征討干戈未定雖有其人而未出耶不然天將開宋室之治以世宗之有志焉而不獲佑之耶嗚呼惜哉

### 南唐論

唐亡而史氏遂以天下予梁也非予梁也強藩悍鎮並起交爭當日之天下未有所歸而天下不可一日無所歸也不得已擇其地大力強者予之其後唐晉漢周遞起而遞以予之猶之予梁也論者謂五代中原之君史家所為正統者皆起於盜賊篡竊無足比數南唐為憲宗子建王恪後以南唐為正統不猶愈未溫石敬瑭之流哉梁於五代之君罪大惡極無論矣唐莊宗之得國猶以正也若晉若漢若周篡弑之罪誠無可逃然視昇之所以得國者有以異耶其篡同較以勢力視彼三君者則又絀也顧欲奪之彼予之此夫孰得而予之曰昇為建王恪後其帝南唐猶之昭烈之帝蜀昭烈雖抑於陳壽及朱子撰綱目卒以正統予之此萬世之公也漢建安二十五年獻帝遇弒凶聞蜀中昭烈即帝位正統相承無可疑者吳楊氏以唐明宗天成

二年。僭帝號。晉天福二年。昇始篡楊氏。改號南唐。其去昭宗之亡。蓋三十二年矣。彼斥朱溫石敬瑭。而欲以正統予之者。將懸其統於三十二年之久。迨昇得國。而後予之乎。抑於昇得國之始。削晉之統以予之乎。兩者皆無據也。且彼所為正統者。具以名耶。五代之君。未有舉正統以予之者也。其以實耶。天下不可一日而無君。絕天下之君於數十年之久。待其人而予之。乃其所予者。則又德不足以有天下。而力未足以一天下者也。其可乎。史又云。昇自言為憲宗子。建王恪後。自言云者。無攷之辭也。昇之果為建王恪後。尚未可知。顧援以比昭烈。謬矣。朱子正陳壽之謬。以正統予昭烈。其於五代。則但以甲子紀年。後之論者。可以折衷矣。

### 靈隱游記

出湧金門。泛湖渡金沙港。丹楓翠壁。盤折紆迴。數里至飛來峯。巖石特奇。而林竹偃覆攢蹙。排擠積翠蒼然。久之晦暝。宿靈隱寺。夜大風發。西北驟寒。質明。由玉乳洞南行。經茆家埠。登丁家山。觀蕉石。鳴琴處。蕉石鳴琴者。李公衛之所題也。其石巉削。狀類芭蕉。磴道旁一石卓立如屏。號蕉屏。李公嘗鳴琴於是。故名。還食靈隱之東堂。明日登蓮花峯。憩三生石。遂如天竺山之天竺寺。由寺左歷磴。過友竹菴。逾嶺至中印菴。遙飛來峯之陰。屈折達靈隱。由羅漢堂西上。登韜光下視江上諸峯。出沒雲際。飄

渺在有無間。旁有路達北高峯。暝色西遲。而余力亦不繼。遂返。明日觀魚於玉泉。渡湖食五柳居。登林逋之放鶴亭。背山面湖。猶有老梅數樹。橫欹亭畔。獨不見元鶴。振翮時也。時甲申九月十有二日。茲游也。得靈隱詩僧寂善。寂善有道而甚文。字業葛。一字藕涯。

月夜飛來峯游記

月於秋宜。而秋夜之月。宜山石。宜淵。宜林。宜僧舍。宜霜鐘。而山石宜穿穴。澗宜流。林宜疎密。虧蔽。僧舍宜茶。宜琴。宜談塵。霜鐘宜遠聽。余以甲申九月十四日。游飛來峯。峯不甚高。而巖石持奇。其下曰龍泓澗。澗為池。曰冷泉。構亭其上。冷泉下注穴石罅。出激激有聲。或流或伏。遠呼猿洞。迤邐而去。山上下林竹蒙幕。涼月澹澹。自東峯上。寒光穿漏。碎影襍。同游者三人。佛者一人。各據石臨流坐。人聲聞寂。茶煙方裊。援琴而歌。揮塵而嘯。霜楓策策。宿翮驚起。久之。僧舍寒鐘鏗然振響。不復知身之在塵世間也。

韜光游記

西湖是處多巨竹。其最勝者曰雲栖。曰韜光。雲栖松篁夾道掩蓋。萬千頃然。其徑迤邐而平。韜光歷石級盤折而上。旁臨湖谷。蒼崖朱檻。高低掩映。視雲栖尤勝。由靈隱

羅漢堂而上。行三四里。達韜光菴。菴後有池。曰金蓮澄泓。可鑑毛髮。池上舊有石樓。今建亭其址。為韜光最高處。憑欄寄眺。江湖下上。遠樹寒煙。風帆沙鳥。歷歷在几案間。宋之問樓觀滄海日。門對浙江潮。蓋謂是也。唐長慶中有蜀僧卓錫於是。工詩與白樂天友善。號韜光後人。因以名其地云。

### 龍井游記

宋元豐間有僧辯才者。住風篁嶺之壽聖院。去壽聖院一里。舊有龍井。辯才率其徒以浮屠法環而呪之。有大魚躍水上。觀者異焉。知井之有龍不謬。而其地遂大顯於時。井圓如月輪。圍之以丈計者得四五。稍上瀑布從山腹飛注。激射噴薄。有池承其下流。其外有亭有臺。有堂皇有迴廊。曲檻有樓。有閣。其祠龍有特室。其石則仆者植者。呀者翼者。竅而穴者。蹲若虎豹。削若劒戟者。怪偉蒼翠。不可殫狀。其樹則巨竹千挺。散布巖石間。風日交影。婉約參差。灑灑可掬。西湖園亭以廿計。而游觀之麗至是而莫有比者焉。余讀秦少游游記。稱茲泉受天地之中。資陰陽之和。以養其源。以推其緒餘。而潤澤萬物。所以頌茲泉之德甚盛。而池臺樓館則概乎未有聞者。今由宋迄今。澹焉寂焉。曾無以加乎其故。而石泉林壑之美。未嘗不日呈露於耳目之間。其或由是而往。更百年更數十年。一時魁傑雄麗。詭異之觀。既已化為灰燼。蕩為邱墟。

而茲泉之德之流於無既自若也以是知物之廢興成毀連變而不可常者皆人之為之其本乎天地之自然者亘古迄今未之有改獨茲泉也哉是為記

雲栖游記

杭州府治東南三十餘里有山曰五雲山山之南一里曰雲栖塢吳越王錢氏建寺號雲栖宋治平二年改號栖真厥後廢興者屢矣明隆慶間僧沈宏轉郭於是嘗有德於其土之民迺庀材鳩工築室居之復其故曰雲栖寺寺介兩峯之間入寺由庖福右轉短籬屈折引而上有亭亭下有澗跨澗橫石梁折而左曰修篁深處清閨香渺偃仰紛離迥非塵世余信宿寺中者再晨起與同游四三人循行石徑宿露初收朝曦欲上幽篁密樾溼翠交橫而林麓間鳥音下上嘹唳間關可喜於斯時也心恬形釋萬化合併飄飄乎乘雲馭風而與造物者游乎乃為歌曰有澗其雲兮山之巔回翔而下集兮其去其旋長吟兮遠眺藉草兮雲眠拾松枝兮巖岫煮白石兮清泉澹容與兮徙倚除穢累兮世牽仙乎仙乎彼無懷與葛天兮將把袂乎此間

孤山路經游記

由錢塘江西上登開化寺寺在月輪峯峯頂面大江隔岸越山掛蹠累積隱隱浮秀行半里許折而右渡九溪十八澗奇峯屏列左右中通一徑沙水紆折縈流澗畔都



藝茶。九十月交。花香狼籍。憩理安寺。酌法雨泉。踟躕而不能去。又西北過楊梅嶺。至水樂洞。五代錢氏時。為淨化院。歲久蕪廢。賈似道以厚直得之。疏鑿導源。泉流復故。其名之者。熙甯太守鄭獬也。又西北至陶莊。登流觀亭。由陶莊還湖上。過六橋。至汪氏園。所為小有天園也。開化寺至此。凡二十里。九溪十八澗。山水尤奇勝云。

### 紫雲洞游記

紫雲洞在栖霞嶺。由岳忠武墓曲折循山逕。凡三四里。達洞口。盤折而下。其高十仞。深數十仞。偃蓋谿谿。虛渺凝蕩。穹然冷然。嶺上下多石洞。其得名者曰栖霞。曰金鼓。曰黃龍。曰蝙蝠。與紫雲而五。蝙蝠逼窄。草樹縱橫。交洞口。雖好游者。不得至。其得至而游者。率幽寂可喜。而紫雲最奇。當五六月間。空翠澄鮮。苔痕滿壁。涼風乍至。心骨雙清。而仰視石隙。藹藹浮秀。按圖紀如栖霞。如金鼓。黃龍。蝙蝠。皆得詳其所以名之義。獨紫雲無所攷。不知名之所自起。或曰洞居嶺上。為煙雲之所出沒。故名。或曰其石紫。其紆餘窈渺。紫繚而蜿蜒。蓋有類乎雲者。故名。

太倉州鐘樓銅鐘記

王鳴韶

凡物之堅而壽者莫過於金石矣。自周秦至今碑碣之石間有存者。若鐘鏞之屬則唐宋所鑄今已罕見。豈至壽者反或不壽與？且古之有鐘所以紀勳績銘功德也。魏晉以降宗廟之制既不行於卿大夫。其有功業者無復廟器之錫。吾不知始於何時而甬衡旋幹之制率視為浮屠氏考擊之用。非吾儒所及知者不亦古今之大升降乎哉？第浮屠之宮自宜壽之愈久。何以三五百年前之器惟山水阻密之地僅存一二。若城府之內遊迹所熟經耳目所習見率多寥寥者何耶？蓋鐘之為器既鉅按羅珍玩者不顧也。而人或利其金以改鑄他器則其幸而存於今者洵難得而可貴也矣。太倉城東南隅有鐘樓焉。基構崇傑尊嚴固安。其鐘乃元仁宗延祐四年十月朝列大夫知崑山州兼勸農事王安貞為海甯寺鑄翰林圖史院編修章嘉撰銘鐘身高八尺圓徑如之上為雲雷之象中勒銘詞并僚佐姓名自安貞而外有曰武略將軍崑山州達魯花赤槃羅不花有曰進義都尉州同知金哈答有曰儒林郎州同知虎都別有曰忠翊校尉州判劉康有曰承事郎州判康鄰下列散員之名不能盡憶。向聞海甯寺有鐵鍋一相傳為煮海運舟纜之器今在寺中鐘則不知何時移置於此。當元延祐之初崑山州治在今太倉治所鐘之鑄也。實當其時修志來者僅列安

貞之名而梁羅不花等關焉。幸此鐘之存可以考而知也。然則金石之遺文顧可忽乎哉。乾隆三十一年春余與張子儔若步青皋尋舊迹相與摩挲欣誦如空山獨行而猝遇良友得不愉快矣乎。竊異此習見之處乘軒輿而來遊者日凡幾輩獨無如吾兩人者拂拭而考證焉夫亦第知樽俎之近玩而不察金石之可通於史傳者與。

信陵君救趙論

錢維喬

事有於理似正於計則非者不可以責古人。信陵君竊符救趙。史遷揚謂其事吾鄉。荆川先生作論罪之。以為信陵知有趙。不知有魏。魏人知有信陵。不知有王。失君臣之分。于春秋之法。嗟乎。此深文。非當日事勢也。夫趙為魏障。魏為列國障。救趙安魏。以固六國。此一舉也。非得已者。令趙非婚姻國。猶當朝聞夕發。如不及赴。夫趙之請救也。數遣魏王及公子書。非不知有王。且公子姊即王姊也。今日徒知有婚姻耳。將以婚姻故而反棄之耶。抑婚姻固公子私戚。而趙為公子私交耶。公子之度於形勢也。審矣。安危所關。安知救趙而他國必不救。果爾。何以為賢公子。且夫公子非必欲自將救趙也。當時晉鄙已將十萬軍在鄴。誠一出師。諸侯必應。力足以解趙圍。魏王觀望。未知唇齒之勢。徒怯秦耳。公子數請於王。安知不指斥利害。慷慨涕泣於王前哉。迨賓客辨士說王萬端。而王卒不聽。謀亦盡矣。力亦窮矣。區區如姬一女子。侯生一監門賤者。顧能得之於王哉。且侯生智士。觀其策公子至矣。兵符重物。而逆知姬之必能為公子盜得符矣。又逆知晉鄙之必疑不授兵。而使朱亥擊之。耳若指掌。計出萬全。令公子不必出此。而可以得軍救趙。豈必陰謀闇闔之中。殺人大將。疏人骨肉。為此危奇之策哉。夫安釐非不能用公子。為其賢能忌之耳。諸侯以公子故。不敢

加兵謀魏者十餘年。公子之重魏明矣。一矯符踐義在外十年不敢歸。何惡之極也。非迫於秦患。公子終不得歸矣。且夫秦并天下。所患者惟韓與魏。以二國塞其衝也。先是安釐將與秦攻韓。公子極諫。謂宜存韓安魏。以利天下。此大策也。其歷指六國危亡先後形勢得失。洞若觀火。卒之決滎澤。灌大梁。魏之亡果如所料。當時明練事勢。才足禦敵。孰有如公子者哉。設早從公子謀。聯楚趙。固韓魏。為天下雁行。頓使秦近無與交。遠不得攻。然後各出銳師以疲之。俾之自救不暇。何至浸淫蠶食天下。竟拱手而西嚮哉。此不能用。坐使韓失上黨。三晉勢危。長平一敗。趙幾亡。滅十年之中。割地拔城。秦益得逞。然而公子一將。則猶破河外。走蒙騫。追奔逐北。五國響應。直扼函谷關。秦不敢出。嗚呼。秦不深畏公子。不萬金行反間。安釐不聽讒言。則公子終為合從長魏。亦不亡。豈非天哉。吾觀公子真霸才也。將殺晉鄙而泣。吾知其仁。欲以死殉趙。吾知其義。將諸侯兵破大敵。吾知其勇。謝病飲酒。明哲保身。吾知其智。屢得士於隱約。吾知其好賢。辭五城。吾知其不伐。納毛薛之言。吾知其從諫。如不及。軍中一令。選兵八萬。此必勝之師。勾踐所以霸越也。吾知其精於兵法。是豈三公子所可髣髴哉。漢有武侯。後主父事之。保蜀者四十年。秦有景略。宗戚舊臣不能間。符堅敕太子等曰。事王公當如事我。卒能滅燕。稱霸。是故國無能臣。雖太阿獨持。無補危亂。

若其臣可大任矣。必寵之重望。使得立威。斯足以鎮內勢。却外患。自古非英主以上。苟得一二賢將相。舉國授之。以爲長城之倚。雖孱弱往往猶以自存。吾所責於安釐者。不能引信陵爲重。未竟其略。如趙失廉頗。燕亡樂毅。卒至敗亡。而反罪王爲失權。公子爲植黨。何哉。

### 水明樓記

水明樓在城東雨香庵之東偏。余去秋來如皋。僑寓於此。吟嘯者累月焉。樓三楹。面西。繚以赤闌。俯臨洗鉢池。池故宋時尊宿洗鉢於此。因名。澄波粼粼。一望浩淼。樓外疎柳數株。穆穆臥水者二。其南密樹中。斷虹半出。時見人影。其與樓對峙者。水榭數椽。屋後高木森會。今爲范氏別業。其東北修竹數百竿。中雜舍宇。爲石氏別業。周遭皆葭莢披拂。隨風蕭瑟。每靜夜月生。波光雲影。空明相映。故曰水明。蓋是即辟疆先生生水繪園故址矣。水繪園者。以此水名也。方辟疆存時。左右數十畝。皆園地。先生好賓客。嗜文酒。四方之士來歸者。悉假館焉。吾鄉陳檢討其年。寓此最久。是時辟疆以名公子。跌宕聲氣。極臺榭花鳥之勝。性豪放。家有聲伎。客至輒張瓊瑜。奏絲管。酣呼竟夕。即有緩急。時復解橐。贈之無德色。以故天下名士樂從之。遊固一時之盛也。不及百年。而風流消歇。瓜分豆剖。此樓乃歸然僅存。當時臨流修禊。鴈詠賦詩。徘徊而

國朝文匯

卷三十三

十一

國學扶輪社印

相賞者非此乎。琴尊劍帙舞裙歌扇。婆婆顧盼於其濱者非此乎。求所謂鶴嶼壺嶺。小三吾月魚基諸勝。邈不可得。蓋及見者罕矣。嗟乎。將人不足以久地耶。地不足以久人耶。抑池亭草木之運固有盛衰而不可繼耶。夫古今遠矣。唯文人學士之筆足以傳物於不朽。山川雖美。無歌賦以播之。則不彰。今即數畝池荒涼寥寂。猶想見公子之餘韻矣。後之視今。猶今之視昔。安知異日登斯樓者。拂舊題。俯空碧。不又有如余之感慨振觸懷辟疆諸君者乎。

候選教諭呂君傳

君姓呂氏。名景尚。字文載。號偶漁。宋泰然先生二十世孫也。父梧岡君名鳳來。績學未遇君。總角承庭訓。即有文名。應邑試。兩冠童子軍。二十八而補弟子員。由食餼貢成均。五十七而登賢書。嘉慶六年會試。後大挑舉人。列二等。以教諭用。歸里病卒。年六十有六。此君出處之大畧也。梧岡君耄而好學。八十餘視聽不衰。然甘澹泊。君先意承志。日則供滄瀡。夕必侍寢。輒舉某書某句。請問伺倦乃退。母孫孺人慈而有禮。尤鍾愛君。君既以饑驅出游。不及視殮。為終身憾。晚又失怙。哀慕益不自已。遂留意青烏家言。日夜按討。頗有悟解。每操小舟。或徒步走數十里。以相原隰。往往腹枵足。論不言疲。有阻之者。會曰。親沒而事親之道無可追。惟此數丈土。所以求沒甯者而

敢不盡心焉。迨得吉壤，復手鑿貞石以銘先人。而君亦隨卒。蓋心力於是矣。瘁矣此君之孝也。君以父為師，中年後躬自教弟，弟亦學成，能筆耕四方。君千里馳書，必以文行相勗，所以護其室者，有無龜勉與已同。有妹既嫁，常迎承老人歡，而庀其家事，以是骨月敦洽，均無間言。此君之友也。呂氏族蕃，梧岡君支出二分，未有專祠，恒慨然念之。會修家乘，君體父志，既司分枝，勞復偕從父兄經營祠宇，殫力落成，於是二分子孫歲時獲展祀所。此君之敬宗收族也。君性慷慨，直不設城府，遇是非侃侃無少媿阿，而慮事精詳，親故間有所誣謗，必為之反覆籌度，至忘寢饋，得當乃已。若身共其休戚者，嘗假館浙東西，逾歲主人輒不忍離，予令句甬六年，君相佐主畫諾，公私鉅細，諮度咸宜。此君之為人謀而忠也。君困躓場屋，以其才識如是，而頭銜僅得學博，壽未及杖國，咸以為惜。嗟乎！人貴大行無媿耳。區區浮榮，曷重焉？君持己以儉，而遇事過耗其神明，然身所當為者，賴以悉底於成，不留遺憾。視彼耽養，竊景浮湛，無所樹立者，相去為何如哉？君娶楊氏，無子，以弟夢炎子鵬瑞為嗣。予知君最深，於其歿也，不敢有所溢美，而為之傳，以備尚論者采擇。其系詳曩所撰梧岡君誌銘，不贊。

國子監學正董君墓誌銘



吾郡有道君子董君既歿之十有一年。其子培將葬君於黃塘鄉廟灣先塋。乞銘於予。予與君為忘年交。二十餘載。知其品概。不敢以不文辭。案狀君諱達存。字華星。號丙齋。先世自教授。公博古官於毘陵。因家焉。十二世祖聖臣。官浙江布政使。曾祖質明。季郡廩生。值國變。不食七日死。祖廷授父位中。皆以儒行聞。母謝太孺人。生二子。長即君也。君幼而穎異。七歲就外塾。矢口成文。師奇之。長遊同邑蔣濟航先生門。先生故以古文名於世者也。君盡得其學。家故貧。且體羸多病。而刻苦自厲。不間寒暑。為文肆力於蘇長公。旁及聲歌駢偶之作。罔不操觚立就。旋補博士弟子員。中乾隆庚午科舉人。登壬申科進士。授國子監學正。君滯於仕進。以太孺人齒高。遂請終養。歸里。晨夕奉侍。衽席膳飲。恆自躬親。太孺人壽九十六而卒。君哀慕如嬰兒焉。君學問該博。家傳青囊書。少即有神解。後出遊。復獲異人授凡形家日者星角壬遁諸術。無不洞達其奧。然頗自秘。惟以相宅墓請者。率應之。所至為人審決衰旺。更易向背。克期輒有神驗。以此名曰隆。東南自大府以下。每營廨宇。必得君一臨相度為幸。所聘遺亦不貲。而君受之灑然。行橐及家。未嘗自潤。購吉壤為先人改葬。建宗祠。置田百畝。以供歲時祭饗。族黨有貧不克葬。不克嫁娶者。咸傾囊助之。所居數椽。僅蔽風雨。冬夏衣故裘。葛塵垢色黝弗厭也。會郡東郊欲建普濟堂。購老疾之無依者。久未

經始。君慨然獨捐千金倡之。乃得集事。樹屋四十楹。儲給廩餼。至今全活者無算。嗟乎。素封之家。出所餘以利人。躊躇多寡。猶有難色。君乃以勤勞所積。輸中人之產。如鴻毛。好行其德。非天性然哉。君謁易近人。而遇所不可夷然弗屑。里居為當道所傾重。然非公不至。絕無請託。嘗有淮陰饒賈。具重幣延君。中道忽不就。單車徑走二千里外。為故人卜兆域。以踐宿諾。飄然而返。其孤介蓋如此。夫趨吉避凶。以前民用。亦聖人之道也。古之擅藝術者。如郭璞顧歡徐伯珍柳世隆諸人。事見傳記。宋儒若邵子精先天數。朱子通曉堪輿。然諸賢皆不得列之方技。良以人品有重輕。未可表偏長而晦全行也。故予所知君之軼事。靈奇頗多。概不書。君生於康熙四十二年。卒於乾隆四十八年。壽八十有一。原配張孺人。次配高孺人。皆早歿。次配今謝孺人。君無子。以族子培嗣。娶楊氏。孫一。得桂。女一。適太學生汪文耀。銘曰。

庚泥得泉。論始管子。乘勝居陳。五行至理。術以道著。上符陰陽。凡所幹旋。逢吉康彊。廣廈鱗鱗。哀梵延景。仁被於鄉。尸祝宜永。佳城蔚然。千載宅魄。絲澤後人。以報爾德。

遊銅瓦寺記

張九誠

出滇城東郊。循盤龍江東北行。平田綺錯。殘柳虧映。至小村。策蹇亂流。以渡十里而遙。為鸛鵒山。或曰山形如鸛鵒。故名。或曰以產鸛鵒。山莽然起於蒼莽之中。北控陝商。南躡金馬。與玉案碧雞爭雄長。若狎齊盟然。未至里許。旭日晃漾。金光赫奕。射山谷欲動。僕夫指曰。此銅瓦寺也。由山南折西北麓。絕壁傑立。數千仞。黝黝無寸膚。怪石如獅象。上下犂逐。欲嚙人。左崖懸一綫石闕。曰一天門。磴而上。踵頂摩錯。老樹怪竹。轉轉森映。凡三百餘磴。得二天門。欲少憩。壁下橫風衝突。萬馬奔蹴。黝然虛黑。不敢駐足。又歷四五百磴。闐然豁訝。仰見白日。曰三天門。平地二百畝。太和宮峙焉。宮勢瑰麗。周廊層阿。絕頂翼然聳出。則銅瓦寺也。寺祀真武。自神像侍從龜蛇及牆柱簾檻几席階城甌甌之屬。皆範銅為之。階下銅幡竿十餘丈。亭亭特立。讀舊碑為明初建。以山似均州太和建宮於上。為祈禱所。不載銅瓦之始。道士出迎。年九十餘。詢云。吳逆踞滇時。所易嘗怪古姦雄僭竊之徒。誅求殺戮。草菅人命。懼天降罰。乃遁於浮屠老子之教。斬山以為窟。範金以為像。九層之臺。黃金之液。曾不之惜。如魏太武唐武后之金佛。劉鋹之鐵塔。楊吳之大鐵鑪。莫可枚舉。吳逆以釜底遊魂。拒命抗誅。鯨呿殛哭。劉人如羊豕。而莊頭之箕斂。彝漢之科派。剝二十四郡之脂膏。以飽慾壑。

天怒人怨莫此為尤而崇鬼神之宮。乾銅至五百餘萬之多。為前古所未有。日率偽屬熏拜諷誦。自謂可以欺天邀神。不知王師一至。草薶禽獮。雖銅城鐵壘。立見銷灼。向之金題玉牘。蕩然無復。灰煙嗚呼。彼侈泰以祈福也。何為者哉。何為者哉。存而不燬。非獨彰國家威德之遠。亦使千古之悖逆者有所懾。道士飯余松棚下。俯視西南諸山。夕陽動盪雲壓。歸鳥之背。滇海風帆。點綴胸次。心殊樂之。乞取敗帚掃廊壁。紀遊之年月。迺去。

乾溪洞記

辰陽以西山益峻。石益詭。最雄譎曰乾溪洞。溪出辰谿縣西南。勢迅悍。洞承其下。流傳深窈莫測。行十餘里。忽徹朗容。萬人牀屋。竈臼咸具。滇叛時土人裹十旬糧。避於此。後洞在洪江澍。溪水所由入沅也。遊以四月望。同行十餘人。午食乾溪堡。望峯如覆釜。左右兩阜夾翼。阜巔各峙一亭。行小徑里許。登左峯亭。下瞰巖駭。桀削水石。隱鱗駭心目。樵人遙指黝然伏者洞也。強其導遊。以無徑。辭皆踐循亭上。余憤然曰。吾必窮其奇。循崖織圻下。予不及踵三之一。斷處縷藤。縶以身為絢。斃擲而下。磴然墮巖。沁顧同游者止四人。躡大石牽緣。猱躐高者獅驤。低者象灑。浮者龜狀。怒者熊鬬。履之震眩欲飛去。遇兩石虎牙對向。各長五六丈。銳其末不受趾。以手為蹠。乃達。

最後匍匐穿一穴。則以腹為趾。怒流靦雷掣電。不得逞。徐轉輟行。若與之鬪而勝者。相與噪笑。乃得平石。縱五畝。旁為車箱束流。狀其底少憩焉。仰望洞門。摩谿橫七八十丈。高三倍之。石如積布疊餅。攢羅旋轉。天蟠飄忽。怪樹壽竹。穿疏筍。突骨中。垂下入洞府。反平行。沙軟苔碧。向之黝然者。城郭堂皇。紫青綠白。可張石家錦步障。石乳溶溶滴。虬鳳蟠攫。閃閃欲動。斜陽倒射。光彩映人面。作五色。沿溪入。左右石乳奮立。成鐘鼓獅象形。殊詭詭。漸昏黑。怪風衝襲。作鵝鴝叫。行十數步。溪水忽擊入小潭。鏗鏘發大聲。聞怪蛇啼。懼而出。邑志云。有別徑緣潭行十餘里。乃得容萬人處。惜無炬。不可入。相與悵然攀石。攀亭小徑而上。視左稍夸。歸驛館。則月上矣。迺援筆記之。同遊者。彭正之。如之。彭氏僕李湘。余僕魏資。

### 遊楊歷巖記

出南雄城二十里。矗立雲表者。曰楊歷巖。志載漢樓船將軍楊僕駐師於此。故名。考秦立五嶺戍。梅銅屯臺嶺。又曰臺關。封臺侯。其將庾勝亦戍此。始號庾嶺。嶺路在今張文獻公新關路之西二十餘里。石磴微茫。一綫猶懸。樓船師下瀆水。由茲道無疑。丁酉三月朔。余往遊焉。未至五里。淵流奔瀉。有桃花片片出。風泉交響。心樂之。轉小峯。由石橋渡澗。從左厂拾級上。入龍祠。祠嵌澗壁。竹木半拂煙翠。千行飛廊曲棧。

皆懸淵中洞賦不可俯視巖窻其腹可受百人泉從頂兩道下絲飛珠灑映日成紅雪僧房冰簾中袖花覆焉鐘魚之音冷然寒綠淵中石龍昂其首聞瀑數壞祠有形家敎僧於龍項鑿銀鐙作鎖狀乃止繁花雜遘幽禽對聒亦神棲地也樓船與伏波同討南越其陷尋陟破石門縱呂嘉之衆以待伏波其功不可謂細迺殺降燒城越人不附歸命伏波誦功德廟食千載樓船姓名問之土人無能舉之者仁與暴異也擊東越征朝鮮功名卒不終宜哉然今所歷之地巖泉淵石作弓刀鐵馬摩挲聲其英氣得毋猶有存焉者耶飯僧寺畢援筆記之匪獨志泉壑之美亦為古名將不善居功者惜也

崇安寺六朝松記

走中州千餘里厥木惟栝柏上羊腸坂躡太行之巔始見松太行之松秀延巖谷最奇偉者陵川城北崇安寺六朝松出棲鳳掌遙望白雲中濃翠浮空者是也門人熊子東川館予寺中寺崇構麗彩甲上黨松覆其上志載隋開皇間建唐曰丈八佛寺元易今名松為隋時物無疑高不可尋丈計仰視虬枝擎攬如從谷底望巔頭翠蓋蒼旗飄渺元灝日月星斗行宿其內抱可五六人龍鱗銅甲荒唐斑駁黠鱗蜿蜒欲動崔伯易賦其大蔽牛恐未見此根穿峻坂下深無底蟻蟻不敢窟聞有東西二株

明神宗時。東者風雷徙去。寺僧補種。今已二百年。尚未及腰臂。予所見六朝松。有名者。長沙嶽麓寺。京都慈仁寺。金陵吳氏園。此為岱長焉。賦五言古詩。有獨對丈八佛。橫撐尺五天句。熊子歎為工切。松前為古陵樓。陵川春秋陵子壽胡國。故以名樓。高瞰城堞。脊吻尚伏松下。樓前左坂有大堆。曰石勒墓。史載勒死。柩夜出。滑痊山谷。聞效尉陀故智。或曰真墓在今佛座下。前代修寺。欲掘之。聞怪聲發。乃止。松疑其墓樹。似後趙時植。予謂勒以梟雄之魁。剪刈晉室。吞王彌。滅劉曜。虎踞二十四郡。其號聲戾氣。為焱風。為暴雨。為怪樹石。為惡獸。理或有之。若茲松。則非良臣碩輔。端人正士。老佛癯仙。無可比擬。肯為閹奴守義道。使鬼作憑依耶。不足信。日布几簞。聽濤聲。高低贈會。鐘磬笙等。爽心愜慮。尤於朝陽夜月為宜。忘身在羈旅。居頃之。熊子以高寒。移余居城中郝文忠公祠。猶時時來樹下。晤對摩撫。如訪良友焉。嗟乎。嶽麓慈仁諸松。皆賴騷客詠歌傳於世。茲松產絕陁。遊屐罕至。世無知之者。然則士之懷貞抱亮。羞與桃李為羣。君相所未知。選舉所未及。徒自偃蹇於荒巖遠壑中。老而不悔者。豈少也哉。物有待而興。惜予非其人也。

### 韓江樓記

韓江受梅循汀三州之水。沆瀣澎湃。至潮郡城北。遏於金山。旋轉其麓。匯為深潭。迺

折而東抱郡趨海郡南大野連海一望無際獨金山麓石壁排聳秀削天半懸崖俯流為寺觀石欄凭焉游人率徙倚不能去長壽庵者舊有小樓窗楹狹隘大樹交翳其前觀察康公涖止喟然歎曰是烏足收江山之勝捐俸購大木拓而新之跨庵脊高踞樹上後為堂前出月臺飛臨倚峯足支胡牀倚隱囊以延眺於是山之修眉連蜷者若可擷以手江之丈錦滌漪者若可濯以足潭之渟膏蓄黛者若可掬以掌風帆沙鳥寺塢村市若可張為圖而置之座公曰是宜名韓江樓樓西青天白日巖首冠以亭曰迴瀾架飛閣曲折通焉行者入乎雲中驟至亭若踏巨龍背瀆溪江濤動賊心目徐而安之亭後石壁玲瓏畢露疏花藤竹穿嵌筋骨中城之緣金山頂而上者薜荔衣焉如青玉屏環擁令人不復思游鳳凰臺樓成公奉檄之羊城未及譙賞初夏參軍深州田君攜榼邀余登焉長空洗鏡百里一碧萬象羅列皆在其下有與造物者游之想樓下江心有泉甘冽潮人鬪茶者皆汲取於此田君命童斟泉向僧借茶具烹活水余與田君坐亭中埃之茗熟啜畢將布席臺上忽韓山生微雲一點金蛇掣空劃江而入暴雨驟然奮擊若雷引之自江底出者黯雲四合橫風捲樓山木叫號雨馳江至從簷瓦臺檻瀉下如銀河奔灑濺珠碎玉風中襲之有萬馬喧阓聲余與田君擊節浩歌以當之雨止雲帶環山其長亘海斜陽激射蔡家園市得微



煙繡之皆成金紫色。布席豪飲。坐待月上。林壑蒼茫。江波潋潋。漁歌棹謳。又如在瀟湘洞庭間也。余語田君。世間山水皆可成蓬萊。方壺觀特無巨手慧心人。為經營布置之耳。觀察公為是樓也。以僻收曠。因險出奇。順其自然。極人巧天工之勝。而未嘗一日享之。余與君觴此頃刻。而收四時之景。其遇可不謂神焉。恐此樂之不可再也。而為文以紀之。

### 東麓縣新築護城隄記

東鹿與深州鉅鹿甯晉皆禹貢大陸澤地。大河故道所經。禹平泲水。民始得耕種。所謂恆衛既從。大陸既作是也。漢元光三年。河徙頓邱。決瓠子。後日南徙。惟潯沱一河行焉。大陸地益高。廣輪數百里。因州縣其地。東鹿曰鄆縣。光武擊銅馬於此。縣連下博。沃野墳衍。博大爽塏。雄於河朔。開元明以來。俗益饒。世家大族多土木相競。市肆貨場商賈駢坌。以閭閻走狗為雄。桃李之華。環三十里。春時金犢油壁。珣鞍繡羈。嬰童治女。炫服闐鬢。挾瑟鳴箏。相望於道。自潯沱流悍倍昔。天啟年間。決晉州東徙。城圯於水。廬舍蕩然。民無奠所。於是謀遷於舊城東南小集。去深州界五里。土重他處。可城卜諸神曰吉。遂築新城。即今東鹿治也。然去潯沱尚近。每當夏秋之交。積霖怒漲。穿恆挈衛。雷掀電掣。碣岸轟圻。城民洶洶。艤航旦夕。汀州李侯至。周覽城原。瞿然

曰積薪厝火。古人所戒。燕雀處堂。其可弗慎。今治邑之急。莫隄若。是年麥歉。收民艱於食。侯曰。不可以勞其少。待明年穀順成。侯乃聚耆紳耆老。謀於庭。咸踴躍曰。如公教。侯倡捐金若干。士民攸助若干。以材來者。以土來者。以工來者。皆惡力不出於己。以貽侯憂。擇謹愿者董其事。侯往來慰勞如家人。兩月而工舉。試以錐不可入。隄起城南。迤西抵西北。枯河岡。計二千丈有奇。是年海沲漲。至隄下。逡巡引去。侯益植柳數萬株以固之。今河且徙西南。隄益闢。柳益繁。登隄而望。烟雲金碧。蒼莽魁雄。仍具河朔盛時氣象。客遊者樂焉。余謂李侯為政。可謂知所急務矣。以佚道使民。雖勞不怨。古訓也。記之。使知河朔之盛衰。視乎人。視乎政。

洋和尚傳

洋和尚。南豐瑤埠村人。姓曾氏。名不傳。人以其兩目。巔綠睛。頂髮禿。但呼洋和尚云。年十五。為邊將所掠。負軍裝出入塞上。壯遂趨勇。雄其曹。能馳驅馬。挽強弓。左右射。聞吳三桂叛。南方騷然。潛脫身歸里。聚子弟之壯捷者。陰部勒之。教步武擊刺。尤有智能。料時變。知耿精忠必叛。叛必遣賊由汀州窺南豐。趙江西而金聲桓變。後建昌諸營兵力弱。不可恃。謀築砦保鄉民。先挫賊銳。得三百餘人。椎牛軍山神廟。漚酒敵血。慷慨論大義。綠睛先閃閃。眾感泣。怒憤願効死力。仰見神面微醺。眾喜曰。神助我。

神助我軍。山者南豐邑之鎮山也。高聳天表。村距山近。多詭嶂奇石。上有天生城。橋可砦。其最險者曰虎頭砦。多石屋。可容千餘人。南僅梯一絙如穴。絙之上塞一石。可限萬夫足。砦兩翼可出守望。洋和尚笑曰。天險賜我。賊不足禦也。乃聚糗糧。厲器械。備井竈。波瀑泉流。指畫戰守計。徙閭村民居其上。寄語城中人。爾第固守。吾必盡剿之。砦下已而賊前鋒果至。先是洋和尚勇聞江閩間。賊計啗以官作鄉導。及至仰望砦形。猙獰斗絕如虎牙。下閭四壁皆欲攬人。猿猴無敢踰。旌幟鉦鼓殊森嚴。賊既膽慄。雲梯呂公車不可試。砦中飛石標弩如雨下。擊殺賊數百人。賊怒毀村屋材薪其下。思燔砦而石壁皆含泉脈。天生滋潤。水恆淋淋漓。火不能焚。賊計窮請其渠曰。若險而固。破不易。盍棄之而趨建昌。渠曰。不可。建昌有官兵在。吾戰則洋和尚必躡吾後。背腹受敵。危矣。以一月糧攻之。必殘。然後西出耳。遂掘塹守之。乘間出他村焚掠。洋和尚佯與衆曰。歌飲俟賊少怠。率死士二百餘從他險縋而下。直斫賊營。砦上婦女各擊銅器。助鉦鼓聲。撼天地。石泉風樹皆震嘯。若萬騎下。賊駭懼不知所為。自踐踏殺之過半。洋和尚斬其渠頭大呼鼠輩敢辱吾刃。令汝取逆戴其頭來。既歸砦。謂其衆曰。小勝勿驕。賊必悉精銳來。吾糧僅足支一月耳。密遣健足齎血詞。問道赴省城告急。十餘日。偽帥李以大軍繼。洋和尚預設伏。磨刀渡左崖穴。俟賊半渡。標弩突

發射殺前隊數將。賊駭多墮。吁江死。氣為奪。指砦切齒罵曰。吾不血此砦。臨洋和尚肉喂大。誓不生。遂掘長塹。築高壘。待砦糧盡。廼屠之。洋和尚每出奇計射賊。相持三十餘日。賊不能動。纖毫而江西大營援兵至。偽帥迎戰。南豐東郊官兵陣稍勦。洋和尚盡其眾下砦。奮力夾斫之。賊大敗。遁歸汀州。南豐以全。帥召洋和尚至。給牛酒慰勞。曰。使江西半壁不動者。汝功也。將奏諸朝。予以官。洋和尚叩首固辭。帥曰。義士即百年後。汝鄉人當祀之。社厚予白金彩繒。洋和尚盡散之。鄉人葺破廬安生業矣。乃日與其徒短衣草屨。漁釣射獵為樂。春秋佳日。擊鮮提觴。登舊砦。狂呼酣飲。每自詡曰。吾能用鄉人。道遠四十餘年。歿壽八十。鄉人憶帥言。塑其像。鑿而鑑。祀諸社。歲旱。以簫鼓彩幟。昇行墟市中。呼曰。洋和尚來。洋和尚來。天果雨。

張子曰。余令南豐。嘗以公事往來砦下。周觀形勢。問守禦處。壯哉。南豐民好義而勇。有緩急可用。洋和尚能以智謀教之。三百人勝三千人。可不謂名將材興保鄉而不尸其功。又與程靈洗異矣。曾氏處士名章。緯者。亦奇男子。語余。洋和尚終身無妻子。老猶自製竹扇。易錢沽酒。醉作擘窠草書。甚怪也。

### 順德節孝婦黃氏傳

順德縣倫教村婦黃氏。年十九而嫁。夫性慙。為人佐刺船。與乙角戲。乙失足溺死。法

論抵減死戌責定。官符下。妻免。婦搏膺呼曰。妻從夫義也。焉有官府而陷人不義者。不聽從。吾當自刺其頸。譚諸縣門。官改容。增婦名。遂盡鬻嫁時物奉舅姑。自製竹擔荷具。隨夫行。黔去粵四千餘里。有九谿七盤之險。夫中途患痢。婦侍湯藥。滌溺。膾拭。拏拏掖之行。薄險則以身負。兩公人贊。敬不忍促。資罄。沿村唱勸。孝順。木魚歌。貨錢易肉食。奉其夫。木魚歌者。粵廣土音也。聞者酸楚。爭醵錢以贈。夫病尋瘳。達戌所。居十七年。生一子二女。而夫歿。初婦私冀邀恩赦。奉夫歸。及死。聞舅姑尚在。急以負夫骨歸。詣縣請。舊例。戌所死。即瘞其地。不聽返。婦慙而踞縣門。類連連觸地。血流被面。伺官出入。輒哀籲。凡二十餘日。官讚曰。剛哉婦。吾當成其義。力白上司。得報可。婦即日懷牒文。裹夫骨負於背。宮置小兒女。孑身行。長女嫁農家。子者。牽裾泣揮之。不顧。時黔東多虎患。白晝出官道。傷多人。捕之不息。而俗禁骨殖。不許入旅店。婦日汲澗水。燒松枝以爨。夜宿古廟。躡虎所殘人骨血狼藉中。昂然不少動。路人爭呼好勇婦。好勇婦竟歸倫教村。婦齒既長。面黧黑醜惡。又語雜羅施音。鄰里駭為鬼。各走避。忽野外有老叟熟視之曰。兒歸耶。指道旁纍纍而翁冢也。而姑僵牆陰。不食已一日。婦奔至牆陰。得姑。兩目眈眈甚。婦引其手拊裏中骨。及宮中兒女。姑抱而咽。婦大號。宮中兒女亦號。聲震林木。風起。鳥皆悲鳴。鄰里稍稍來。始奉姑。僦屋以居。順。

德人士以其事入詩社賦者多至五六百首讀者為泣下羊城馮孝廉公侯者勇義人也聞其貧無以贍姑走告同儔炎日中髯張目如炬五日而敵番銀三百枚使授婦有敝廬薄田矣而順德李侯鉉其允人士請給匾曰節孝含辛導鼓樂旗幟金字大書周子寬之妻節孝黃氏旌其門人遂名其詩曰含辛集婦入黔十九年而歸人或呼之曰女蘇武云

### 偃師楊烈女傳

偃師女楊氏父為縣庖卒母與兄皆歿依姪姪以居字李恆子嫁有日矣一日大雪姪歸甯遺女獨居鄰屠蕭諒光暴無行素豔女色聞知姪出挾刀踰牆排闥入女坐燈下罵曰汝何人敢黃夜入吾家屠出刀恐之掣其衣女左手牢持衣帶而以右手奪屠刀叫罵益厲屠知不可犯大憤以刀斷其頭并截右手五指身仰地霍霍躍屠懼越牆去父眠廐中忽聞窗外女聲連呼蕭諒殺我大駭起城門久扃父歸踰城濠深積雪不敢躍若有擁之下弗苦抵室女屍橫室中頭及五指在地左手猶牢持衣帶不可解號諸鄰逐雪中血跡入屠家得血衣及刀羣繫屠訴於縣官至驗視女左手衣帶乃解鞠屠屠作女言盡吐狀下獄中獄未上屠俟守懈雉經死官竟從吏言寢其事女葬隄兒頭洛水流經墓前每旋轉作悲咽聲四十餘年矣會

天子登極 詔直省大吏接遺行襄城李緝者以明經任縣訓導廉知女烈欲上其事商諸令以伊父死無實證且年久執不可緝憤怒自臚女死狀懷牒赴大梁訴河東制府白公鍾山公憐而寤之具疏入 告

天子特命旌其閨入祀節孝祠主入祠日鄉人旌幟鼓樂聚而送者千人祠臨市衢數年後有醉者衝戶入仰臥地下恍惚見羣婦女皆冠帔肅然起叱逐之有一女厲聲曰吾隄兒頭楊大姑也醉者驚覺急奔出祠顛踣至家發狂疾鄉人醺牲醴詣祠為速連叩頭乞寬罪久之迺蘇

張九鉞曰烈女雪夜倉卒拒暴斷首截指以殉節勇矣哉抑何慘且酷也死後入廐呼父護父躍濠立擒暴赴官有勃勃不可遏之勢即令英魂親見暴之屍衢竿木猶不足雪憤迺暴既逋誅女之烈事鬱鬱四十年然後表著於天下何歟向微

聖天子闡揚幽隱李司訓勇於從義亦終與草木同腐風露漸滅焉耳悲夫聞司訓獨為烈女請旌時與邑令爭詬於庭嗟乎誰司風化之權者或寢其獄於前或格其事於後何秉彝好德之性與人殊也今烈女靈爽震赫東都司訓之名藉以不朽彼見義不為者非獨曠官直庸愚人耳其名何足污吾筆哉

鞏縣張烈婦傳

烈婦鞏縣雙槐村民王思周女。貧居土窯。足跡不出戶外。年十七歸里民張良善。事舅姑以孝聞。父傭於外。母孫氏迎烈婦歸。其居族姪王保子者。亡賴人也。常驅驢負煤。遇思周門。是日。矚知烈婦。母出未歸。夜獨與幼弟二禮宿窯前。淫念三更。潛攜刀排窯門。門固閉。以刀穴門。傍土轟轟落。烈婦覺。疑為賊也。呼不應。披衣起。將踰之。土崩門塌。保子入。烈婦驚問。為誰。保子求姦。烈婦執其聲叱之曰。我爾族姑也。禽獸何敢為不義。速出。免死。保子拔刀脅之。烈婦厲聲曰。刀何為者。任爾殺。不懼。保子憤。不從。己以刀刺烈婦中左脅。血從襦中噴出數步。益怒罵。保子連連刺左右肋乳。烈婦躍奪刀。刀割烈婦掌。掌裂。梓之於地。而二禮亦驚覺。連呼保子殺我姊。保子并斫其臂。僵於牀。烈婦奮身從地起。血淋漓滴。奔出窯門外。大呼殺人。而鄰居殊遠。保子追出。烈婦創重。足躓於石。顛棟樹下。罵益厲。保子搯其髮。刀抉其口。烈婦口齧刀。齒齧齧有聲。保子搖刀出。割頰及腮至耳。烈婦不能言矣。叫聲猶不絕。身霍霍躍。勒其喉。斷乃死。時乾隆三十五年十月十五日事也。保子歸。匿刀滅衣血跡。驅驢煤窯。天明有鄉約過。見烈婦被殺死。奔告父與夫。入窯中。裏二禮創少。哭述姊被殺狀。衆擒保子入縣。驗鞫得實。弔而哭者日千餘人。獄具。大吏以烈狀聞。詔予旌。給帑建坊。祀節孝祠。誅保子。暴屍於市。



張九鉞曰余修羣志見明長洲鄭瑛韓烈婦碑傳之及檢張烈婦詳案及邑薦紳公請旌文別為立傳事過二十年英風猶旋薄紙上也以余所見志中拒暴殉身者多矣未有壯且慘如此之極者雖古睢陽常山何以異哉烈婦居洛汭偃師楊烈女老居亦濱洛嗚呼名山大川靈光瑰氣鬱律數十年必發洩於人而烈婦復以身膺之也悲夫

偃師三孝子合傳

乾隆二十六年秋伊洛大溢水破外隄灌城洶洶有聲民皆避水奎星樓上張大觀者奉母亦登焉水撼急樓傾眾皆溺大觀左手為樓石柱戕臂至腕皆折不斷如縷血漂波赤不顧入奔濤救母孫號救大觀叱之去望母髻露水中得之負出水有老樹橫偃衢口大觀曳其斷手獨以右手舉母騎樹枝上復泗而覓食食母母撫其斷手泣伴慰母兒手雖折幸不創母自愛母憂水退負母歸家猶屏當衣食是夜創重竟死同日有蔡應泰楊璞事

蔡應泰母死水將至以繩縛母柩旋繞數十匝令固兩大帶為纜水至妻子號救不應跪負母柩轉洪波中上下柩與手若兩翼飛瞬息八十里下鞏縣神隄灘神隄灘者北却山尾也山橫洛口過黃河河漲倒灌洛流紫旋灘上柩忽為沙擁邨民異之

以長釣引至岸。昇之上。蔡亦無恙。天將暮。聞鄰邨喧救兩人。趨視之。則其妻與子也。眾嗟歎曰。神威也。醴錢送之歸。

寺莊民楊璞與其弟某奉母居。弟饒於貲。璞貧且懦。水至。弟以筏載其妻逃北山。母呼之不應。竟去。璞怒。棄其妻子。極母於背。將浮沈抵北窰。水勢奔驟。若有挈之者。旋躍大溜中。山上人望之。如鷗鷺。湍瀆不沈。亦下神隄灘。邨民救之登岸。頃之有一婦人抱子漂下。母遙望忽號曰。吾婦與孫也。救之果然。翼日歸。而其弟舟將抵北山下。大樹崩壓舟。夫婦俱溺死。先是邨民夜聞空中神語。明日當速救孝子母。民驚起。各具舟與竿以俟。以故俱得生。母壽九十餘。無疾終。璞今六十餘猶在。

### 偃師任天篤九世同居傳

偃師僧生任天篤。其家自山西洪洞遷。邑之顧城鎮。鎮為成周時緱氏邑故城。顧故字沿錫也。其地濱洛川原平衍。土厚水深。自其四世祖光玉至四世孫瑞豐。九世同鎮共爨。男婦至一百六十餘口。河南巡撫何公裕城以其事。聞諸朝。

天子嘉

悅。親灑

宸翰。以詩章匾額旌之。復

賜緡帛表宅里。任氏之盛。遂駕唐壽良。

張氏宋江州陳氏而上之。先是天篤祖開昌。生五子。俱以力耕讀書為業。開昌欲其勿析居。先試之。潛以金二百置麥園中。為士免士舜所拾。以告開昌。開昌佯曰。此天

賜也。汝二人曷分取之。二人以子無私蓄。堅請開昌。喜曰：是可教矣。迺立永不析產議。使士堯條為家訓。一曰：婚姻為人倫之始。二曰：孝弟為教化之原。三曰：杜私為正家之要。四曰：勤儉為持家之法。博引經書史傳先儒家訓。以己意發明之。大書刊懸祠堂中。其喪祭遵紫陽家禮。不涸僧道。而冬至祀始祖。立春祀先祖。本程子意。兼用邛文莊公累世同居。得行立春一祭之禮。其訓婦女。尤得易家人受以睽。淡意謂家道之離。由婦人。田真泣樹。繆彤自搗。往事具在。令新婦三日廟見。後家長召至中堂。以熾惡利害。反覆引伸。其說俟彼心領神會。無間言。乃使隨眾婦後。視饌佐膳。不率者再教之。弗悛。暫令反母家。給以日供。使被母氏開道。俟愧悟立迎歸。新婦入門。許用簪珥紵羅。廟見次日。即分貯中堂公廚。局識之。俟歸甯領用。給布衣椎髻。操作于棉花紡織。隨時變易。備嫁娶貲。朔望次日。家長坐中堂。以孝經女訓訓婦。女紉繹其旨。母憚煩。以故婦女母私饋。母私假。母飾容觀。母適私室。母貪黷禁羣居。交勸禮義。年五十始不執役。其或不終所天者。母入廚衣食稍豐。以厲節。眾婦更番代勞。母怨言。女適人者。夫死守志。母墮節。其開子弟之法。母鮮衣怒馬。母越境逐末。母入城市。母傳述時事。母詭竊偷生。耕讀外。惟令學醫濟人。母索酬不能者。則令執本家百工之業。凡陶冶織薄。皆予以值。母廢人。母見尊長傲嫚。母口斥人。非母行不讓路。其居

室堂居中為宗祠。環以昭穆。母素婦女。由他道出入。毋混行。厨分内外。左右。毋踰闕。食先男後女。皆以班序。母僂越。母出。嚙聲。母嬉笑聲。遠外望其莊。雲霞赫。煙火錯繡。牛羊雞犬。日夕自歸。無俟呼叱。儼然朱陳。邨畫圖也。聞當事詢天篤。不析產。故對曰。不忍也。其言較張公。數書忍字。義尤大而遠。可以報國恩。可以培元氣。可以懲頽俗。可以召祥和。余故因天篤所呈家訓冊。撮其要作傳。將以示天下後世之閒有家者。

藥師院苦行僧傳

藥師院苦行僧。居院五十年。人不知其俗姓。以其永州音。呼永州老和尚。又即所建亭。稱曰複亭。師云。師長七尺餘。貌癯而黑。少年隨其父。別駕某官。蜀中。好擊劍。任俠。父以虧官。項繫獄。師徒步走南北。輦三千金。歸救父。護之歸鄉里。一日。忽棄其妻子。入蜀。轉徙無定。常為人報讐。誅其猾。匿迹邊塞上。挽鐵弩。射生番。蠻人聞其嘯吼聲。輒奔去。邊帥欲予以官。不受。能徒手搏虎。松潘山中。為害者。殺幾盡。一日。殺虎。嗅刀頭血。忽有悟。詣峨眉山中。伏虎寺。落髮為僧。然恆鬱鬱不樂居。聞我眉中華絕頂有老頭陀。年百餘歲。跌坐懸崖中。跣足躡深雪。攀天門八十四盤而登。至懸崖跌所。五體投地。頭陀睨視之。笑曰。若來耶。此山非若安身立命處。東走四千里。遇馬祖。即住。

為苦行僧可矣。師未讀經錄，不知馬祖為何如人。以頭陀言，即縛行膝東下瞿唐穿九谿，歷洞庭瀟湘。一日至武功山，遇同寓人問馬祖居何處，人曰：豫章省城北門外七里街右有藥師院，咸稱馬祖道場，豈其是耶？師拍掌大笑曰：得之矣。乃兼程至其地，見江岸遼闊，荆棘荒蕪，法象傾圯，破殿半闕，僅懸殘額，藥師院三字。師恍然曰：豈吾師欲我作苦行僧，重新此道場耶？適急治輟鋤，冒風雨，竭胼胝，墜院前荒田三十餘畝，積歲之所入，為修葺費，不立募疏，不繁工役，一木一石，咸出己手。二十餘年，棟宇巋然，龍象森列，成巨制矣。復於院之左右種竹，幾數十萬本，中構一亭曰：複亭。為習靜所。桃李梅杏之屬環焉。余自玉峽調南昌，勘濱湖水災，月夜橫舟江岸，聞踏水車人歌，鏗鏘可聽。問之曰：此永州老和尚自作太平車水歌七言詩也。勘災歸入院，訪之年八十餘，以鄉人握手如故，坐所居簾箕中。苦辨稚筍，縱譚移晷，贈以七言二律。有曰：參來猛虎刀頭血，飛下我眉雪頂身。今日簾箕聊對坐，艸書如斗尚驚人。簾箕用馬祖偈中語也。師大喜，作擘窠大字書之於壁。嗣後以公事過，必坐複亭中聽竹聲。流連竟日。師傾自作香醪酣我。余大笑曰：余今日真可謂一口吸盡西江水矣。或曰：師有異術，能驅虎豹，役鬼神。江漲以鉢汲水，呪龍立退。七里街居人有病者，以手摩其頂，即愈云。

重修周大夫義宏墓碑

古賢人君子懷才抱器不幸仕於衰弱之朝不克展其用卒含冤飲憤死非其罪論世者每惻然憫之周大夫義宏吾聖人從之問樂又屢備周王顧問蓋春秋時賢者周土不能用之酬對諸侯壯赫濯之威迺屬之劉子其城成周也左氏載女叔寬之言曰義叔遠天不祥若宜不免刑戮者嗚呼東遷以後問鼎之師耀於疆客容之猛出於境王室陵穹不絕如縷大夫與劉子糾合諸侯遷都以延周祚其謀不可謂不善彼趙鞅者吞噬范中行為瓜分晉室之漸彼固忌大夫從謀王室卒以劉范婚姻為紂而周王甘戕其賢才以媚之周室遂卒不振如左氏言將使大夫洪忍竊祿坐視宗周之隕曾蔡婦之憂不若反得為順天之智乎嗚呼此駁誣之說為後世庸臣喪國者藉口而忠臣義士所謂椎胸而嘔血者也三年化碧之說本於莊子其事近怪聖人所不語然大夫盡忠王室肝腦塗地精神氣焰如虹貫日與嵩邛河洛爭流峙萬古不可磨滅斯又理之常無足異者墓在偃師城東北二十里北邙山下化村村因化碧為名歲久漸圯乾隆初年郡守張公漢重修之以詩記立碣今又五十餘年矣荆棘生焉牛羊踐焉余適茲邑過之夷然心傷迺為除翳掃礫新義道固甃封立碣以識之并表大夫忠所事之苦心祛天厭周德之譌說於右大夫有靈其可以

從龍遜比干於地下而無憾也夫。

重修畢氏先塋饗堂碑

唐畢氏自東平遷河南之偃師。世有達人。景公之治行。忠義公之大節。平章公之相業。歷歷著於史冊。忠義公塋在景山之北。原圖譜燦然。守戶猶數十家。其裔孫在東南者。繩繩振振。至國朝。簪纓益盛。今河南巡撫大中丞公秋帆先生。開府西安時。駐節塋下。瞻拜揭碑。以表顧其地為史姓雜處。不便有所修治。乾隆乙巳。移節中州。綏輯撫循。歲以大稔。乃怵然曰。某荷

天子恩寵。來治於鄉。賴先靈庇蔭。幸無隕越。而龍邱近在咫尺。原田湮佚。烝嘗缺如。追甄之典。未舉。其曷以揚國恩光泉壤。於是出廉俸。授邑令。南皮湯君毓倬。繚以周垣。樹之松柏。以四千餘緡。易史姓地。復祀田之舊。建饗祠三楹。俾族姓奉祀事。勤灑掃。是役也。公省衣縮食而為之。纖毫不以擾官民。民大悅服。丁未仲夏。公閱兵東都。遂以修謁祀之日。積霖暄霽。景物熙和。遷豆几筵。敬恪將事。公瞻仰松楸。潛然出涕。邑民扶老挈幼。環而觀者數千人。皆感歎泣下。九鉞以是年冬。襄修邑乘。得拜塋下。周覽形勢。枕嵩室。拱邙垂。伊洛內紫。太行長河襟帶於外。實具雄深勝概。於時邑士民相率而言曰。天佑畢氏。使其後賢振起南邦。節鉞故土。崇封展祀。焜耀山川。靈

最遠公嘉謨嘉猷敷布十州以先人之福福我桑梓德最厚修墓之舉不震我師而事藏典最肅請為文勒諸碑以彰吾邑古今盛事昔魏鄭公墓至墓而復之文潞公立先廟於洛陽請制度祭器前史稱之其事皆近在數世如公之公忠體國不私其身而水源木本感惕於中尊本敬始義隆自遠尤前史所罕覯且忠義公効節於唐身食其報數十世後公復出應昌期推誠宣力無忝厥祖茲之修墓教孝教忠知捐軀殉難之臣猶能荷異代光榮世世子孫感激奮勉其義至深且遠故不敢以弁陋辭謹順輿論民情樂觀厥成之意紀其實於石匪獨邑之光亦使後世史官有所攷系以銘曰

嵩高之靈昔生甫申細緼哀延鍾於洛濱土婁之南景山之北惟唐畢氏鬱鬱佳宅廣平節烈彪炳日星常山睢陽平原是衡光遠有耀更昌南裔篤生我公奎文上第弼亮皇朝策功懋庸必復其始而亢其宗移節豫州畫錦不居春秋霜露念先人墟樵採雖禁粉榆未表按厥圖讖兆域可攷丸丸嘉樹莪莪義門有牆持持為屏為藩饗堂有規豐碑有制秩以置田祿以補器其祠維何松楸柏版不丹不堊儉以垂遠其田維何守冢是明黍稷雖薄維德之馨蜺旌龍節旗旒翩翩自東都來以至於阡公製祝詞其文赫奕曰揚君恩曰紀祖烈公仰靈邱悽愴報飭清醑在樽豚肩



在豆河岳高深載錫之光公福鄉人永承其慶世篤忠貞代生良弼勒諸貞珉其言維寶